

# क्षमा पोश



बद्रीनाथ 'अभिलाष'

# क्षमा पोश

बद्रीनाथ अभिलाश



(येमि किताबि हुंघ सॉरी हकूक छि महफूज़)

|                    |   |  |
|--------------------|---|--|
| किताबि हुंघ नाव    | : | क्षमा पोश  |
| शॉयिर              | : | बद्री नाथ अभिलाष   |
| कम्प्यूटर डी.टी.पी | : | आई आई एल एस<br>471/2, मुठ्ठी जम्मू<br>गिंकू कौल 9419136369 |
| ग्वडन्युक छापन सनु | : | 2003 ई०  |
| दोयिम छापन सनु     | : | 2010 ई०  |
| त्रेयिम छापन सनु   | : | 2018 ई०  |
| चूरिम छापन सनु     | : | 2019 ई०  |
| पुंयिम छापन सनु    | : | 2023 ई०  |
| तेदाद              | : | 300  |
| म्वल               | : | Rs.150/-   |

किताब मेलनुक पताह

मकान न० G-135, स्यकटर 1,

दुर्गानगर, जम्मू - 180013

Mob. No.: 9796853999

मूल निवासी : अच्छन, पुलवामा, कश्मीर।



वयकुंठ वॉसी पिता श्री दर्शन लाल पंडिता  
अछन तहसील, पुलवामा विनॉसी

रुत रुत सोरुय द्युत छुम चोनुय ।  
म्योनुय बैव्यनय जय जय कार ।  
खँड्य फुट्य ड्यकसुय ल्योब थोप चोनुय ॥  
म्योनुय बैव्यनय जय जय कार ॥०॥

अभिलाश





Khema Posh 1st Edition, 2003. Released on Nov. 2013 at K.P. Amphalla Jammu. From left Sh. B. N. Abilash, Sh. Moti Lal Bramchari, Sh. Pran Nath Bhat Gareeb Bhai Jee, Sh. Mohan Lal Aash, Dr. B. L. Koul (D.Lit.) and Sh. J. N. Sagar.

## बागनय

| नं० | शीर्षक                 | सफ नंबर |
|-----|------------------------|---------|
| 1.  | श्री गणीशाये नमः       | 22      |
| 2.  | कर्म जाल               | 25      |
| 3.  | वरदान दितम             | 27      |
| 4.  | शंकर अज वलु सालु सोनुय | 30      |
| 5.  | गोश थाव                | 33      |
| 6.  | कुस वनि मै             | 35      |
| 7.  | मे बॅल्य अभिमान        | 39      |
| 8.  | मन मिलनाव              | 41      |
| 9.  | अँन्दुर्य लबुहन यार    | 43      |
| 10. | अजलु लोन               | 45      |
| 11. | जगतुच राजिरेन्य        | 47      |
| 12. | व्यतरावुन प्योम        | 50      |
| 13. | जटादर शिवु शंकर        | 52      |
| 14. | फॅर्ययाद               | 54      |
| 15. | पूजा बु चॉनी क्या करय  | 57      |
| 16. | बु पोश लागय            | 60      |
| 17. | चानि लोलुच रेह         | 62      |
| 18. | सॅच                    | 65      |
| 19. | वनि कुस                | 67      |
| 20. | वनु जोगयो              | 69      |
| 21. | मे वोद कोताह           | 73      |
| 22. | अनुहारु चाने           | 75      |



|     |                           |     |
|-----|---------------------------|-----|
| 23. | अनुग्रेह पनुन अनुभावतम    | 78  |
| 24. | ऊर्य नु यूर्य             | 81  |
| 25. | लोलु मस                   | 83  |
| 26. | फवल्यम दिलुकिस डलस पम्पोश | 84  |
| 27. | मे सपदि संतुष्ट           | 86  |
| 28. | रछ मेति पादन तल           | 89  |
| 29. | ही भवॉनी                  | 91  |
| 30. | वोवुम कूत ब्योल           | 93  |
| 31. | ग्वड मे होतमय             | 95  |
| 32. | छोरुय पान                 | 98  |
| 33. | बडि भगवानु                | 101 |
| 34. | राधा चॉन्य                | 104 |
| 35. | मॉज सरसोतिये              | 107 |
| 36. | क्या करु व्वन्य           | 109 |
| 37. | जॉल्य हारि                | 111 |
| 38. | सन्तो वनतो                | 114 |
| 39. | व्यनथ                     | 116 |
| 40. | यॅष्ट दीवस कुन            | 119 |
| 41. | अज़ यितु गरु म्योन्य      | 120 |
| 42. | गाशि मंद्युन              | 122 |
| 43. | क्षमा पोश                 | 124 |
| 44. | जटन्य चान्यन पुशरुम पान   | 126 |
| 45. | मेति चाव लोलुक शराब       | 128 |
| 46. | ऑही कॅर्यतोसे             | 130 |
| 47. | वांगुज वोर                | 133 |
| 48. | दिल वुछिहे                | 135 |

## लोलुक प्रसाद

येलि काँसि हसास इन्सानस बखित भाव छु नाल वलान तस छु  
 हनि हनि पनुनिस सौर्यसुय वजूदस लोल गनान । ल्यहजा युस ज्यतु सु  
 वॉलिंग मंज ललुनावान छु, छुस वारु वारु वुहान तु तमिकि जोशि छु  
 तिमु वतु तलाश करान यिमन प्यठ पकनु सुत्य तस पनुन अंदरून हना  
 शीतलता प्रावान छु । अख साधक सिरन ठानु तुलनुक जस्तु खॉज छु  
 करान तस छि चैनन तु चितरनुक्यन थर्यन दूर्य फोलिथ यिवान ।  
 चैननुक तु चितरनुक यि आलम छु त्युथ जि तख्खयुल क्यन वेरनागन  
 छे पॉन्य पानय वुजिन्य लगान । अथ मंज छुन तगनगॅरी या ज़ोर ज़बरदॅस्ती  
 हुंद कुनि ति अमल दखल । अथ मंज छु अनुभवय योत मोहरिक बनान  
 येमि वजह किन्य इज़हार छु जायुन लबान । चैननु तु चितरनु पतु तथ  
 लफज़न हुंद जुव ज्यतु बखशुन छेनु गफु कथा । अति छि कम कम  
 हॉरिथ गॉमित्य । मगर यिमन दयि अनुग्रेह सपुद तु अनुभवचि छटु  
 शिकारि मंज वॅसिथ अंदरूनकिस सॅदरस मन्थन कोर तु तिहिंदुसुय  
 इज़हारि ख्यालस तु बयानस सपुद दवाम हासिल । यिमव मंजु छे लल  
 द्यद, नंदुर्योश, परमानन्द, शमस फकीर, समद मीर, कृष्ण जूराज़दान,  
 मास्टर ज़िंदु कौल तु नील कंठ शर्मा खास तोर काँबलि ज़िकिर ।  
 बहरहाल बखति भावस मंज स्वग्वन तु निर्ग्वनवाद ओक तरफु त्रॉविथ  
 छे अख कथ वनून्य ज़रूरी जि बखति भावस मंज या अमि कुसमुचि  
 शॉयरी मंज छु जज़बुक श्वज़ुर तु पज़र स्यठा अहम्यथ थवान । तमी  
 सुत्य छु शॉयरी मंज इनक्सार तु खोलूस ह्यकान छटु मॉरिथ । आम



तोर छु जज़बु कि श्वज़ुर किन्य औरचर भाव ति व्वतलान । ल्यहज़ा  
छु येमि ज़मानुक्यन सिरी शारु अदबस सुत्य वाठ थवन वाल्यन (खसूसन  
शॉयरन) हुंजन तखलीकन मंज़ कुनि नतु कुनि रँग्य लाचारुगी, बेबसी  
तु अफसुरदगी हुंघ सँन्य तु व्वगुन्य नज़रि गछान ।

अख अहम कथ छे यि ज़ि मरनुक भय छु प्रथ कॉन्सि ज़्यहनस  
मंज़ कुनि नतु कुनि जायि मूजूद युस औरचर करनुकिस ऑखरी हेर  
पॉविस प्यठ छु वातुनावान । मसलन कृष्ण जू राजदान छु ऑकिस  
जायि आशितोष शिवस यिथु कँन्य अर्चाना करान:-

हे मृत्यंजयि येम भयि निशि रछ मे आसय च़ेय शरन ।

शिव शंकर, शिव शंकर अन्तुकालु पालुवुन बन ।।

या अँम्यसुय सदाशिवस कुन त्वता करान छु बेयिस जायि वनान:-

ज़्यनुक मरनुक ज़रय कास ह्यथ कालुन्य भरय सदाशिव ।

यिछुय हिश व्यनती छे कमो बेश सरिवुय कुनि नतु कुनि  
पननि शॉयरी मंज़ कँरमुच । व्वन्य गोव येम्य यिथु पॉठ्य सूंच तँम्य  
वँल्य पननिस सोंचस तिथी हिव्य वसतुर तु यि सोंच छु 'अभिलाशस'  
ति तु सु छु यिथु पॉठ्य अथ ज़्यव बख़शान:-

दयि गथ पनन्य चुय हावतम ।

मृत्यु शिहुल अनुभावतम ।।

यम येलि कर्यम प्राणन दरय ।

सेदि बुथि निज़्यस परमीशरय ।।

मगर सुती छु तमना करान तु यछान ज़ि:-

अभिलाश निहन येलि चुय गरय ।

पोत कल थॉव्यज़्यस नु अख ज़रय ।।

यी थवतु मनज़ूर ईशरय ।

सेदि बुथि निज़्यम परमीशरय ॥

मरुन छु हँकीकथ तु यि तलखाबु छु प्रथ अँकिस चोन तवय  
किन्य छे अमिच थरु आसुन्य क्वदरती मगर जुवनस सुत्य यिमति  
लवॉज़िमात वाबस्तु छि तिहुंद आसुन तु तिहिंज यछा करुन्य ति छे  
ज़रूरी । ल्यहज़ा यिति अख इन्सान येछि तु येमिच कामना करि ति  
अगर नु सहल बामल यियस तैलि करि सु पनुन्य कामना स्यद गछनु  
बापथ कॉन्सि नतु कॉन्सि व्यनती तिक्याज़ि यि त्रावि तस शवूरस प्यठ  
असर तु क्वदरँती यिन अथ अछरु वरदन ति लागनु । पतु अथ यि वनुन  
ज़ि लीलायि अदबस सुत्य वाठ थवन वॉल्य क्या छि बेछि बानु ह्यथ  
द्रामुत्य छु सरासर गलथ तिक्याज़ि बेछनस, कामना करनस तु यछनस  
मंज़ छे ज़मीन आसमान फर्क । मजलून सुंदिस ऑमिस प्यालस, ग्वसॉन्य  
सुंदिस कशकोलस, मुसॉफिर सुंदिस हलमस तु ललि हुंदिस बतु दूरिस  
मंज़ यस नु फर्क तगि करुन्य तस क्या वनव ? बहरहाल यि वॅनिथ छु  
म्योन मकसद युतुय वनुन ज़ि लीला गो शॉयिर ति छु येमी आलमुक  
तु समाजुक अख फर्द यस छांडनस सुत्य सुत्य ज़िन्दु रोज़नक्यन  
बाकुय लवॉज़िमातन हुंज़ ति ज़रूरथ छे तु तस ति छु यिथय पॉठ्य  
सोरूय केह छांडुन यिथु पॉठ्य यिछु कथु करन वॉलिस ति छांडुन छु  
प्यवान । ल्यहज़ा छेनु यिछु ज़ेहनी व्वतलबुजि कांह ति, मानि थावान ।  
यि कथ गछि हना साफ 'अभिलाश' सुंदि वॅन्यमुति येमि बंदु सुत्य:-

बेख्या मंगस बस बखति भावुच ।

दपस मे सुमरन दि पननि नावुच ॥



बु जूल्य दौरिथ छुसस गदागर ।

मे सपदि सनत्वश्ट सु टोठ ईशर ।।

‘अभिलाश’ छु आशितोष शंकरस पननि भावनायि हुंछ ब्यल  
तु मादल शेरि लॉगिथ तु पादन तल व्वथरॉविथ पनुन्यन बॉतिनी चेशमन  
गाश प्रवानु म्वखु यिथु कॅन्य यिनुच प्रार्थना करान:-

यॅचकाल वोतुम वतु चानि गरान ।

अनि गटि मंज छुमनु केह सारान ।।

गटु चुय कासतम छुख प्रजलवोनुय ।

शंकरु अज व्वलु सालु सोनुय ।

मगर आशितोष सुंदिस कृपा करनस छु व्वमेदवार तिव्याजि  
शिव छु बखति भावय प्रसन गॅछिथ दयायि हुंछ बर यलु त्रावान तु  
टोठान खास कर तस येम्य पनुन सोरूय आसुन तु नॅ आसुन तॅस्य  
पुशरोवमुत आसि, चेशमु ति आसनस तॅस्य कुन दरस तु यछाह आस्यस  
तॅस्य मंज लीन गछनस:-

गोव यि पथ कुन ती छुन मॅशरॉविथ ।

गोसु म्योनुय सोरूय छुन त्राविथ ।।

द्वन कुनुय युथ बनि जन अबसनु वरु ।

आदि शंकर अज यितु गरु म्योनुय ।।

यिथुय पॉठ्य छुस बेयिस जायि वनान:-

दयि सुंज दयि गथ निशचल तु अटल ।

तथ बदलावनुक छुन कॉन्सि ति बल ।।

तमि किन्य तॅस्य गछि पान पुशरोनुय ।

शंकर अज व्वलु सालु सोनुय ।।

बखति भाव यूताह गनान गछि साधनायि हुंघन पोशि वनन ति  
छे तमी अनमानु ह्यवान फुल्य लगुन्य । साधकस छु अमी सुत्य पनुन  
अंदरून ज़न तु ग्वलाबन हुंजि ख्वशबोयि सुत्य बैरिथ वासान तु व्वंदुक्य  
रतन दीफ छिस सु गाह छटान येमि सुत्य सॉरी अनि गटु गाशरावन  
यिवान छस ।

अभिलाश छु यि पूर पॉठ्य ज़ानान ज़ि योताम बखति भावकिस  
नागुरादस बुबराय लागि तोताम छु मॉर्यफतुक जाम प्रावुन ना मुम्किन ।  
वनान छु:-

कीवल कुनुय छुम च़े निशि मे हाजथ ।

नेति नेमु च़े क्युत केह गछुन संच्यथ ॥

वुज़नाव बखति भाव यथ नु आसि पयमानु ।

भगवानु, भगवानु, भगवानो ॥

दरअस्ल येलि लोलुच रेह छे हैरि ब्वन आवरान तु तति छुन  
पतु इन्सानस तगान बोज़नुय ज़ि क्या करि । येमि वरॉय कि सु छु परम  
ब्रह्म परमीशरस वछि वॉलिंजि नालु दिवान तु आलव करान । यिहॉय  
हालथ छे अभिलाशस ति:-

परमीशर, रामीशर, ज़गत ईशर भगवन ।

चानि लोलुच रेह मे गँडनम दँज़ शरीरस हन हन ॥

चॉन्य दूरिरन सूर कोरनम छुस बु संकट बूगन ।

चानि लोलुच रेह मे गँडनम दँज़ शरीरस हन हन ॥

अथ मंज़ छुन कांह शक ज़ि दज़ु दज़ु सुती छु मज़ु मेठान मगर  
सुती छुस व्यनती करान तु वनान:-



सुय मे दियहम तिछ अठकल जामु रोजिहम न्यर्मल ।  
 छुय डलस अंदर जलस प्यठ यिथु कॅन्य रूजिथ कॅवल ॥  
 दाग कर्मन हुंघ नु लगहन जामु लॉगिथ प्रचरन ।  
 चानि लोलुच रह मे गँडनम देंज शरीस हन हन ॥  
 बहरहाल अभिलाश छु सुपुर्दगी हुंद कौयिल । जगत अंभायि  
 हुंदिस टोठनस तु शिव सुंदिस प्रसन सपदनस प्यठ छस यछ तु पछ ।  
 शिव तु शखती हुंघन पादन पान पुशरिथ छु अस्तोती ति करान तु  
 यिमन व्यनय प्रयन ति करान यि जॉनिथ:-

खोलि दरवाजु बोलि जन कोस्तूर ।

ग्रजि आलम वजि साज सन्तूर ॥

नचि सृष्टी दृष्टी चाने ।

ग्वड मे ह्योतमय लीलायि चाने ॥

संपूर्ण सपदनुच यछाह छे प्रथ कौन्सि आसान मगर मुक्कमल  
 सपदनुच व्वठ छांठ छु खालुय कांह करान । मगर यस ग्वरु कृपा  
 सपदि तु पनुन्य साधना तग्यस वति लागुन्य सुय गछि हनि हनि प्रथ  
 जालु मंजु आजाद तु पूरनतायि हुंदिस आँखरी शिखरस ताम वाति ।  
 स्व गॅयि लल येमि सोरुय कॅह सरु कॅरिथ वोन:-

ओमुय छु व्वथ पथ ओमुय छु स्वरुन ।

ओमुय छु व्वपदीश परम ज्ञान ॥

ओमुय परुन ओमुय स्वरुन ।

ओमसुय सुत्य छे जॉनी ज्ञान ॥

व्वन्य गव बावनुच तु व्यछुनावनुच परंपरा छे अनुभवस तौबीन  
 (अथ मंजु छनु कांह जोर जबरदॅसती) । युस योत वोत तॅम्य वॅन्य

ततिची शैछ ब्वद। पननि मकदूर मुतोंबिक छु अभिलाश ति वनान:-

पन ओमकी मन रोज़ि यैलि खारान।

दुफ दज़ि तय रुफ रोज़ि पानु प्रज़लान।।

बनि पूरन ननि तस क्या छु भगवान।

वनु जोग्यो मन किथु रोज़ि साविदान।।

इन्सान छु फितरी तोर पारुद्य मिज़ाजुक तवु किन्य हैकि नु  
 अँमिस सोच अँक्यसुय डंजि रूज़िथ मगर साधनायि हुंदिस सागरस  
 मंज़ वँसिथ छुस पनुन मन थ्यर करुन ज़रूरी। बू छुस कांछान ज़ि  
 अभिलाश करि द्वह ख्वत द्वह पज़रुक्य संगर सरु खरु तु अँम्य सुंदि  
 अनुभवुक प्रकाश प्रज़लावि अँम्य सुंद अंदरून द्वह पतु द्वह तीज़ी  
 सान।

अभिलाश साँबुन्य यि सोबरन “क्षमा पोश” छे अँम्य सुंदि  
 प्रज़लवुनि पगहुच निशानदिही करान तु दयि नाव स्वरन वालयन हुंदि  
 बापथ लोलुक प्रसाद।

मक्खन लाल ‘कंवल’

पुरखू मायग्रंट कैम्प, जम्मू।

25 सतंबर 2002



## अख म्वलुल इज़ाफु

भक्ती हुंछ छि जु अहम जुज । अख गव प्रेम तु ब्याख श्रद्धा ।  
 येलि प्रेम तु श्रद्धायि म्युल सपदि भक्ती छि वजूद प्रावान । दूशवन्य हुंछ  
 अहम गवन छि यिकवटु रैलिथ भक्ती भावस आकार बखशान । लोलुक  
 वुशनेर तु श्रद्धायि हुंद आनंद अनुभव दूशवय छि भक्ती मंज यिकवटु  
 द्रींठ यिवान । भक्ती छु सामाजिक भाव तिक्याजि अथ मंज त्रे जुज -  
 बैखुत्य, इष्ट तु भक्ती ।

ऑल्य नाश गछनु पतु छि गरि न्यबर कॉशरि शॉयरी मंज जु  
 अहम नैहजि परन वाल्यन हुंद ध्यान पानस कुन फिरान । अख गॅयि  
 विस्थापनुच शॉयरी यथ मंज सोन रावन त्योल दिलि जिगरस वैह छु  
 तुलान तु जलोदभैव्य व्यनाश लीला इन्सॉनी कदरन ख्वठ ज़द कॅरिथ  
 लतु म्वंजि करान । दोयिम छि भक्ती शॉयरी य्वसु वारयाह काल  
 सपदिथ दुबारु शद-ओ-मदु सान जँदीद कॉशरि शॉयरी रूहॉनी थज़र  
 तु बजर बखशान छि । यि छु अख नेक फाल । पननि इखलॉकी कदरु  
 ख्वठ जंद कॅरिथ येलि इन्सान पननिस वजूदस प्यठ सोच छु ह्यवान  
 करून तस छु पनुन आसुन ग्रज़वुनिस आरस मंज यीरु वसवुनि नावि  
 हुंछ पॉठ्य तबॉही हुंदिस बुथ्य फिर्य आरु पलस कुन दवान बासान । सु  
 छु खोफ ज़दु सपदिथ दयस नाद लायान तु आरु हचव चेशमव दयि  
 वथ छारनि नेरान । सु छु लल दैदि, शेख नूरदीनस, परमानन्दस, रवपु  
 भवानि, कृष्ण जू राजदानस, लक्ष्मण बुलबुल तु मास्टर जियस याद  
 करान ईशर मायि वलनु यिवान । श्री अमर नाथ दर ('दर्शन'-1993

ई०), भवानी भाग्यवान द्यद ('मन पंपोश'-1998 ई०), श्रीमती बिला रैणा ('रेश माल्युन म्योन'-1998 ई०), स्व० निरंजन नाथ सुमन ('शेषकल'-1998 ई०), श्री प्राणनाथ भट गरीब ('संजीवनी'-2000 ई०), श्री काशी नाथ बागवान ('अछर गौद्य'-2001 ई०) तु श्रीमती गिरजा कौल ('गुरु दक्षिणा'-2002 ई०) छि अजकलचि नाव ह्यनस लायक भक्ती शॉयरी करन वाल्य ग्वनमात यिमव लूकु मॅत्य सुंद ध्यान ज़नतु मुहिथ न्यूमुत छु। आध्यात्मिक सोचुक थज़र, बजर, गॅहराँयी तु व्यस्तार, फिलास्फी तु रूहॉनी आनंद प्रावुन तु परखावुन, ऐहसासि हक तु वजदॉनी कुफियत गर्ज सॉरी अहम पहलू छि अज जॅदीद कॉशरि भक्ती शॉयरी मंज वखनय प्रावान तु परन वाल्यन, स्वरन वाल्यन क्यो बोज़न वाल्यन रूहॉनी आनंदुच शेछ बावान।

पंडित बदरी नाथ अभिलाश सॉबुन्य यि तखलीक “क्षमा पोश” छि जॅदीद कॉशरि भक्ती शॉयरी हुंदिस खज़ानस अख म्वलुल इज़ाफ़। अछन पुलवाम्युक असली रोज़न वोले अभिलाष जी छु दयस लोल बरान, ल्वलु ख्वल करान, ल्वलि ललुवान तु शोरि श्रद्धा पोश निछावर करान। यिम छि पॅज़्य पॉठ्य दयि बॅखुत्य यिमव मनु मंज़ु ख्वचर ज़ॉलिथ रूहॉनियतुच वथ रॅटमुच छि। अथ वति प्यठ पकुन छु स्यठा मुशिकल। मॉदी ज़िन्दगी हुंद मुलुमाय छु इन्सॉनी सोचस खुर अनान। सु छु कलु कापि ह्यनु यिथ निनु यिवान। अभिलाष छि दयस शरण सपदिथ, पनुन तु परुद मॅशरिथ ईशर अनुग्रह खॉतरु हलम दॉरिथ भक्ती हुंज़ि वति प्यठ गामज़न। कर्म ज़ालस मंज ह्यनु यिथ ति छु तस स्यकु विशवास ज़ि:



स्वकर्म क्वकर्म बकार यिन पानस ।  
 प्रछुगॉर येलि लगि थानस प्यठ ।।  
 द्वद तु पोन्त्य ब्योन ब्योन नेरि तमि कालय ।  
 ह्यनु आख कर्मन हुंदि ज़ालय ।।

(कर्म ज़ाल)

योहय आत्म विशलेषण तु आत्मबोध छु (Self Analysis and Realization) जॅदीद कॉशरि भक्ती शॉयरी सोचकि एतिबारु थज़र तु बॅरचर बखशान । अभिलाष छु अथु तुलिथ आरुहचव चेशमव दयस व्यनती करान कि:

अज्ञानस मै स्वज्ञान दितम ।  
 वरदान दितम वरदान दितम ।।

(वरदान दितम)

शिव बॅखुत्य अभिलाष छु शंकरस बावु कोसम पज़ि लोलु निछावर कॉरिथ तु आशितोष कृपा प्रावनु खॉतरु अँहम गॉलिथ तु सूहम प्रज़नॉविथ सूरु मॅतिस यिथु मनु नावनुच कूशिष करान:-

यॅचकाल वोतुम वतु चानि गारान ।  
 अनिगटि मंज़ छुम नु केंह ति सारान ।।  
 गटु चुय कासतम छुख प्रज़लवोनुय ।  
 शंकर अज़ वलु सालु सोनुय ।।  
 म्वख हाव बॅखुत्यन छु तमना चोनुय ।  
 शंकर अज़ वलु सालु सोनुय ।।।

(म्वख हाव बॅखुत्यन)

अभिलाश छु ईशर वंदनायि मंज शिवस सुत्य सुत्य शख्ती  
ति बाव कोसम निछावर करान तिक्याजि तस छु विशवास जि शख्ती  
वराँय शिव छु शव । तवय छु सु माजि चरन रटान तु व्यनथ परान:-

मूल मूर्खा अज हय आव चानि डेडि तल ।

गछि मेहरबान रछि मेति पादन तल ।

नेशिब्वदसुय व्यशयव कॅर गांगल ।

गछि मेहरबान रछि मेति पादन तल ।।

(मॉजी वुजनावतम)

मे छि व्वमेद जि अभिलाष साँबुन यि भक्ती बाँतन तु लीलायन  
हुंद मजमुव “क्षमा पोश” गछि अकवुहिम सूदी हुंजि काँशरि भक्ति  
शॉयरी मंज अख बेश कुमती इजाफु साँबित । बु छुस यिमन यिहिंजि  
ईमानदारानु कूशिशि प्यठ हुबु सान मुबारक बाद दिवान ।

भूषण लाल कौल

(डी० लिट०)

बरनाई बनतालाब

3 जनवरी, 2003 ई०

ॐ



## आत्म ज्ञानुक अभिलाशी

बद्रीनाथ अभिलाश छु बख्ती सागरस थाह लायनुक अभिलाश  
ह्यथ । अँम्य छु पनुन आसुन तु बासुन तँस्य पुशरोवमुत । अँमिस छु  
दरदु बोन्यन तल म्वरली शब्द कनन गोमुत । लल देदि द्युतुस आलव,  
'गोबरया तार छुखा मंगान ? वोननस:-

तप ज़पु निशि अभिलाश म्वखासुय ।

करतम मनि मंज़ वासुय चुय ।।

बख्ति भाव प्रेरना हृदयस त्राव ।

मन मिलुनाव भगवानस सुत्य ।।

व्यनथ कँरुन, 'मे गोछ बख्ति भाव' । आलव गोस, 'तथास्तु' ।  
अती प्यठु गोव यि साधनायि मंज़ लीन । बख्ति भावस मंज़ लीन  
सपदुन गव सँहजु अमर्यथ गलि गलि चोन । बख्ती सुती छि मुख्ती  
हुंघ दरवाज़ु यलु गछान तु अंधकारुक्य ठँर्य म्वकलान । अध्यात्म  
सिरयि व्वदयस यिवान । अमी वोनन:-

मे छम व्वंदस कल वुछिहथ चु वारय ।

बु पान पननुय चै डालि खारय ।

यि पान अर्पन छु चानि वेरे ।

चु योद चलख व्वन्य मे चोन फेरे ।।

अमि तलु छु ननान ज़ि अँमिस छु भावनायि हुंदिस सँदरस  
तलातुम । अवय छुस आरु होत व्यनथ करान ज़ि चु योद चलख व्वन्य  
मे चोन फेरे । अँमिस छु आत्म ज्ञानुक सु तस्सवुर दीदमान यथ आलूहत्युक

ब्रांद पोव छि वनान । अँमिस छु कनन दिदरि गुं गुं गोमुत तु व्वन्य छु यि  
आगमुक्यन मुशॉहिदातन मंज़ मशगूल तु सिरयत क्यन गँजीनन छुस  
ठान व्वथनस तयार ।

यिम बखित रसुक्य आलव बूज़िथ छु परन वोल् खबर कमन  
तस्सवुरातन मंज़ आवुर सपदान तु वाराह कालस बेखुदी हुंदिस आलमस  
मंज़ भावनायि हुंघ रंग वुछान ।

ब्रदीनाथ अभिलाश छु प्रकाशि थानस वातनुचि कूशिश मंज़  
महव । दय बूज़िन अँम्य सुंद यि ऑरिज़्यव सपदिन पूर ।

मोहन लाल आश

स्यकटर-1, दुर्गा नगर, जम्मू ।





## भावनायि हुंद पोशि गोंद

यि म्यॉन्य स्वंबरन छेनु कुनि मनसूब बंद शॉयरी हुंद नेंतीजि  
 बॅल्यकि म्यान्यन ऐहसासन तु भावनायन हुंद पोशि गोंद । यि भावना छे  
 मे परमपरायि हुंद द्युत । अथ सुत्य छि म्यॉन्य संस्कार वॉटिथ । मे छु  
 शुर्य पानु प्यठय ऐहसासुक शोहजार सायि कॅरिथ । बु छुस पुलवॉम्य  
 तॅहसीलुकिस् 'अछन' गामस मंज ज़ामुत । यि गाम छु क्वदरॅती नज़ारव  
 सुत्य मालामाल । रेम्ब आरु छु अमि गामुकिस् दामनस तु यारु बलन  
 नालुमॅत्य करान । अति छु भॉरव राज स्वामी जगन्न नाथ जी सुंद स्यठा  
 मशहूर अस्थापन । अमि अस्थापनुक हवालु छु राजतरंगनी मंज ति  
 मेलान । यि छे तॅच बारगाह । अति युस ति हाजथमंद दॅश गंडि तस छु  
 मुराद पूर सपदान । कामना स्यद गछनु पतु छु अति राजु कठ करनुक  
 र्शति पूर प्यवान करुन । अति ओस तकरीबन वुहुर्य वॅरियस यि सिलसिलु  
 जॉरी रोज़ान । दोयिम प्रथा ऑस यिज़ि अमि गामचि कूरि सुत्य युस  
 नेथुर करिहे तस ति ऑस अति राजु कटुच बॅली ज़रूरी दिन्य । यि वादु  
 करार ओस लॅगनस प्यठ करनु यिवान । अमिकि प्रभावु सुत्य ओस  
 सॉर्यसुय अछन गामस अख अध्यातिमक वातावर्ण दिलस तु द्यमागस  
 व्यहातु कॅरिथ रोज़ान ।

म्यॉनिस गरस मंज ति ओस दयि नावुक स्यठा चला दोर ।  
 येमि किन्य म्योन तख्खयुल तु तप्फकुर वारु वारु मुताँसिर सपदान  
 रूद । तु म्योन बॉतनी संसार ओस कुनि कुनि सातु तॅम्य सुंद अनुग्रह  
 प्रावनु बापथ बेकरार सपदान । यिहय बेकराँरी बनेयि म्यानि तुक बंदी

हुंद आगुर। बु छुस नु शॉयरी हुंद दावा करान बॅल्यकि अख ओरुत  
बॅनिथ जगत अंभायि हुंदिस ब्रांदस नखु आहुजॉरी करान। मै छेनु ख्वद  
फरामोशी या इरफान ज्ञात हॉसिल करनच कांह व्यद बॅल्यकि अँकिस  
आश्रेत्य सुंद ऑरिञ्चय। योहय भावु रस कोरुम चरनामर्यतुक्य पॉठ्य  
यथ “क्षमा पोश” पुस्तक रूपी बानस मंज जमाह। ताकि अगर कांह  
लोलु वोला अम्युक नॅवीद ग्रहन करि द्यवु मेति मेलि तम्युक फल। तु  
जिदगी हुंद कांह मकसद गछि हॉसिल। तुहंज गछि आही आसुन्य।

बु छुस कॉशरि अदबुक्यन त्रन बहलिपायि शखसियतन श्री  
मक्खन लाल कंवल, श्री मोहन लाल आश तु डॉ० भूषण लाल कौल  
(डी-लिट) सॉबुन स्यठा आभॉरी यिमव म्यानि यथ भावनायि अथु  
थोव प्यठु। यिहिंदि व्वस्तादानु नजरि तु आशीर्वादु सुती सपुज मै यथ  
कामि मंज सफलता हॉसिल। श्री रतन लाल जौहर सुंद ति छुस खास  
पॉठ्य मशकूर यिमव न सिरिफ यथ किताबि नागरी लिपि हुंद वरदन  
लोग बल्कि शेरु पॉर ति कॅरहस। श्री पी.एल.सुदेशी सुंद ति छुम  
ऐहसान येम्य यथ किताबि शूबिदार सरु वरुक बनोव।

**बदरी नाथ अभिलाष**

स्कटर-1, दुर्गा नगर जम्मू

१०८२



## श्री गणीशाये नमः

स्वंदर छु साथ अज कोताह जान,  
 श्री गणेश अज बनतु म्योन मेहमान ।  
 व्यनती बोजतम तु थवतम दान ॥  
 श्री गणेश अज बनतु म्योन मेहमान ॥०॥

पूजा चॉन्य ग्वडु प्रथ कांह करान,  
 महादेव सुंद छुस योहय वरदान ।  
 लोलु किन्य सोरुय जगथ पूजान ॥  
 श्री गणेश अज बनतु म्योन मेहमान ॥०॥

प्रथ कारस छुख रथि खारान,  
 थोद पीठ चोनुय नाव चोन महान ।  
 सन्तुष्ट रोजतम ही कृपा निदान ॥  
 श्री गणेश अज बनतु म्योन मेहमान ॥०॥

बावनायि किन्य अज दोरुम ध्यान,  
 सालु यियि गणपत छुस बु तोशान ।  
 मेहमान रोजुम बनय म्यजमान ॥  
 श्री गणेश अज बनतु म्योन मेहमान ॥०॥

चानि पूजायि हुंद कोर मे सामान,  
 दोहस अँनिम सोंबरिथ पोश जान जान ।  
 पोश लागय पूजायि तलसों म्योन मान ॥  
 श्री गणेश अज बनतु म्योन मेहमान ॥०॥

लोलु चानि कॅर्य तयार मे कम पकवान,  
 लॅड्य तु रोठ च़े छिय ज़्यादु प्रयान ।  
 रोज़य बु आपरान गछ़तु ख्यवान ।  
 श्री गणेश अज बनतु म्योन मेहमान ॥०॥

ग्वन चॉन्य बेशुमार छुमनु त्यूत ज्ञान,  
 अंधकार कासतम दितम पॉर्यज्ञान ।  
 गनु च्वदुश द्वह छुसय यी मंगान ॥  
 श्री गणेश अज बनतु म्योन मेहमान ॥०॥

पापन तु शापन लोगमुत फ्युर,  
 ज़िन्दगी म्यानि आव तमिकुय खुर ।  
 कोताह च़े वनय ज़ानि म्योन पान ॥  
 श्री गणेश अज बनतु म्योन मेहमान ॥०॥



दास छुस चोनुय येंच अनजान,  
जांह प्योस नु पायस फोरुम अभिमान ।  
डर छुम अडफोल मा गछि म्योन पान ॥  
श्री गणेश अज बनतु म्योन मेहमान ॥०॥

गरु कैर्य कैर्य येति गोल म्योन पान,  
तिलवॉन्य वानस दांद ज़न लमान ।  
सुम म्यानि लोसु व्वन्य नचान नचान ॥  
श्री गणेश अज बनतु म्योन मेहमान ॥०॥

बॉय बंद तु बांदव छिनु केह दिवान,  
मॅरिथ छिस दवह पाँशि रिवान वदान ।  
नॅव कथ नवि दोह्य सोरुय मशान ॥  
श्री गणेश अज बनतु म्योन मेहमान ॥०॥

प्राता कालस छुसय यी मंगान,  
वासनायि म्यानि रॅट्यजि पानु कमान ।  
युथ नु व्वद राव्यम बेयि डल्यम ध्यान ॥  
श्री गणेश अज बनतु म्योन मेहमान ॥०॥

## कर्म ज़ाल

जान छुख नु पानु म्यानि बोज़ येमि हालस ।  
ह्यनु आख करमन हुंदि ज़ालय ॥

दूर छुख प्योमुत चु निशि भगवानस,  
संसारु ज़ालुकिस वानस प्यठ ।  
द्वख तु दौद्य वुछ वुछ दिवान छुख नालय ॥  
ह्यनु आख करमन हुंदि ज़ालय ॥० ॥

स्वकर्म क्वकर्म बकार यिन पानस,  
प्रछुगौर येलि लगि थानस प्यठ ।  
द्वद तु पोन्थ ब्योन ब्योन नेरि तमि कालय ॥  
ह्यनु आख करमन हुंदि ज़ालय ॥० ॥


करमन क्वलुछ छुय गिलु क्या छु गौरस,  
मतु दितु दर दिल वौरस जाय ।  
अज्ञानु सेंदरस मतु दितु छालय ॥  
ह्यनु आख करमन हुंदि ज़ालय ॥० ॥



अज पगाह कॅर्यथुय वॉन्स गछि नीरिथ,  
 यावुन ति छुम गछान बुथ फीरिथ ।  
 वासना मे फिरवान बालु पथ बालय ॥  
 ह्यनु आख करमन हुंदि ज़ालय ॥०॥

द्वह अकि श्रुक तु ह्युक लागि यथ पानस,  
 गॉफिल रूदुख चु सत ज्ञानस ।  
 रुशवथ ति केंह नसॉ रटान महाकालस ॥  
 ह्यनु आख करमन हुंदि ज़ालय ॥०॥

ज्ञान वोन जॉनियव मुडव कोर नु विशवास,  
 दयि संजि छेपि लॅग्य चीदु बैयि खास ।  
 दय येलि छांडुहान चलनय ज़ालय ।  
 ह्यनु आख करमन हुंदि ज़ालय ॥०॥



## वरदान दितम

अज्ञानस मे स्वज्ञान दितम ।  
वरदान दितम वरदान दितम ॥

थज़ि कामनाये डेडि तल,  
खयदार शीशस तुल मे मल ।  
यूगी ज़नन हुंद त्रान दितम ॥  
वरदान दितम वरदान दितम ॥० ॥

दरबार छु चोनुय येंच महान,  
प्रज़ुनावि सुय यस आसि ज्ञान ।  
सुय ज्ञाननुक व्वन्य ज्ञान दितम ॥  
वरदान दितम वरदान दितम ॥० ॥

येति वारि वारे द्रायि कुत्य,  
कर्मफल पनुन ह्यथ सुत्य सुत्य ।  
क्रेछर तु मेछर ज्ञान दितम ॥  
वरदान दितम वरदान दितम ॥० ॥



कर्मफल कुडुर ह्यथ आस बु योर,  
 ज़ांह मा मे अथ प्यठ केंह व्यचोर ।  
 येति योर व्वन्य शोहजार दितम ॥  
 वरदान दितम वरदान दितम ॥० ॥

द्वह राथ कौरुम मे ख्यन तु चन,  
 डंजि मा रोटम मे ज़ांह ति मन ।  
 चंचल मनस थ्यथ थान दितम ॥  
 वरदान दितम वरदान दितम ॥० ॥

व्यनती चु बोजुम दार कन,  
 शोज़राव बॅख्ती किन्य मे मन ।  
 संसार सॅदरस तार दितम ॥  
 वरदान दितम वरदान दितम ॥० ॥

तुलमुलि चु छखना रॉगिन्या,  
 ज़गतस छि चॉनी ऑगिन्या ।  
 डेडि तल तेंती रुत्य फल दितम ॥  
 वरदान दितम वरदान दितम ॥० ॥

क्वछि मंज़ रॅटिथ द्वद चावतम,  
 मेछर त्म्युक अनुभावतम ।  
 द्वद शुर बु छुस बोड शान दितम ॥  
 वरदान दितम वरदान दितम ॥० ॥

वेरि चानि ह्यथ आस पोशि गोंद,  
 माता मे कासतम जन्मु म्यौंद।  
 प्रथ सातु युथुय व्यचार दितम॥  
 वरदन दितम वरदान दितम॥०॥

दरबार छु चोनुय अन्त रोस,  
 अमरयथ मोदुर तति ठानु रोस।  
 चमुहा दितम यकबार दितम॥  
 वरदान दितम वरदान दितम॥०॥

चनु ब्रोंठुय मॉज वनु बु क्या,  
 अंदर मनस छम त्रेश स्यठा।  
 गंगा अछैन्य हिश दार दितम॥  
 वरदान दितम वरदान दितम॥०॥

मुर दौरिथ 'अभिलाश' डेडि तल,  
 ज्ञानुक चु म्वछि फोल त्राव जल।  
 ह्वबि ह्वबि ख्यनुक सुय वल दितम॥  
 वरदान दितम वरदान दितम॥०॥



## शंकर अज़ वलु सालु सोनुय

म्वख हाव बॅखृत्यन छु तमना चोनुय,  
 शंकर अज़ वलु सालु सोनुय ।  
 छुन कथा त्रॉविथ चठ मलालु प्रोनुय ॥  
 शंकर अज़ वलु सालु सोनुय ॥० ॥

जन्मन हुंद द्वख स्वख छुस बूगवोनुय,  
 यि छु कर्मफल म्योन प्रोनुय ।  
 प्रालब्ध फल छुम मनि प्यतरोनुय ॥  
 शंकर अज़ वलु सालु सोनुय ॥० ॥

पापन प्रान्यन अज़ ख्यमा करतम,  
 वरतम मै पनुन्यन चरनन तल ।  
 दारि ओश त्रावान सन्तान चोनुय ॥  
 शंकर अज़ वलु सालु सोनुय ॥० ॥

माया ज़ालन प्रथ अंदु वोलनस,  
 हंगु मंगु बंद गोव पान म्योनुय ।  
 शतरुत मा छुस मै सुत्य प्रोनुय ॥  
 शंकर अज़ वलु सालु सोनुय ॥० ॥

शूबवन्य तु लूबवन्य सामानु हावान,  
 कमि कमि छलु छुम ब्रमुरावान ।  
 वुछ वुछ छांगरि मन गछान म्योनुय ॥  
 शंकर अज वलु सालु सोनुय ॥० ॥

संसार जालन वोदनस च्वपॉरी,  
 अथ मंज छुस बु हॉर्य हॉरिये ।  
 अमि मंजु कडि ब्रस अनुग्रेह चोनुय ॥  
 शंकर अज वलु सालु सोनुय ॥० ॥

येंचकाल वोतुम वतु चानि गारान,  
 अनि गटि मंज छुम नु केंह ति सारान ।  
 गटु चुय कासतम छुख प्रजलवोनुय ॥  
 शंकर अज वलु सालु सोनुय ॥० ॥

जायि जायि फ्यूरुस चाने माये,  
 छायि गित्य छुख करान कमि राये ।  
 छाय मे कासतम चलि जूनि ग्रोनुय ॥  
 शंकर अज वलु सालु सोनुय ॥० ॥



गाल छा केह सन्तान व्यंदनुय,  
 जन्म म्योन अज रथि खालुन छुय।  
 नेव कथ छेनु केह रिशतु छु प्रोनुय॥  
 शंकर अज वलु सालु सोनुय॥०॥

दयि वति पकनस क्रेछर छु चालुन,  
 देहकुय अभिमान गालुन छुम।  
 अनुग्रेह करतम छुख मोल म्योनुय॥  
 शंकर अज वलु सोनुय॥०॥

सालु यिख सोन अज छुस तवय तोशन,  
 डेर केरिम बंगि तु दतुर्य पोशन।  
 अमि ब्यन वनतम क्या ख्यन छु चोनुय॥  
 शंकर अज वलु सालु सोनुय॥०॥

‘अभिलाश’ छांड़ान बखित बावु वरशुन,  
 ठठ कथ छा सौं दर्शुन चोन।  
 यिनु चानि प्रजली ड्यकुलो न म्योनुय॥  
 शंकर अज वलु सालु सोनुय॥०॥

## गोश थाव

डेडि तल चानि आस बावुनि हाल होश,  
 गोश थाव म्यॉनिस बोल बोशस ।  
 सन्तान चोनुय वुनि छुन ज़ी होश ॥  
 गोश थाव म्यॉनिस बोल बोशस ॥० ॥

डेडि तल चानि आस मायि छुस वोलमुत,  
 डालि छुम ओनमुत अख व्यनु पोश ।  
 जोलि मंज़ कडनस बासान छुम रोश ॥  
 गोश थाव म्यॉनिस बोल बोशस ॥० ॥

ज्ञानुच नु ऑर्यज़ान ध्यानुच नु पॉर्यज़ान,  
 ज़नुम न्यशफ़ैल्य गोम छुस तवय पशेमान ।  
 ग्रह पीडायि सुत्य रूदुम नु केंह ति होश ॥  
 गोश थाव म्यॉनिस बोल बोशस ॥० ॥

न छुस बु बुद्धिमान न छुस विद्यावान,  
 सरि राह प्योमुत हालि हॉरान ।  
 ठानु रोस बानु म्योन कति रटि छाव जोश ॥  
 गोश थाव म्यॉनिस बोल बोशस ॥० ॥



गुदरुन पननुय ज़नमुक बावु कस,  
 कुस बोज़ि मे हिविस अनज़ानस ।  
 पाद ठँहराव मॉज ग्वडु बु लौचुरावु बोस ॥  
 गोश थाव म्यॉनिस बोल बोशस ॥०॥

प्रातः कालस ऊषा चु द्रायख,  
 भाग्य वानन हुंद गरु चायख ।  
 तिम रूद्य खॉली यिम ऑस्य मदहोश ॥  
 गोश थाव म्यॉनिस बोल बोशस ॥०॥

‘अभिलाश’ रोट दोहय आलुछ्य तु न्यँन्दरे,  
 यँन्दरे तु वासना छस वरफतार ।  
 पापव तु शापव अकलि कोरहस ओश ॥  
 गोश थाव म्यॉनिस बोल बोशस ॥०॥



## कुस वनि मे

द्रोग कूत छु दयि दर्शुन,  
 स्रोग मा छु कुनि बाजारस ।  
 योदवय छु कुनि बाजारस ॥  
 कुस वनि मे कथ शहारस ॥० ॥

तमिकुय पताह मे वैन्यतव,  
 नतु शौछ तसुंज मे अँन्यतव ।  
 जल जल बु तूरय लारस ॥  
 कुस वनि मे कथ शहारस ॥० ॥

यँच काल गव मे प्रारान,  
 तस आदनस बो छारान ।  
 वॉन्स गँयि मे ईन्तिजारस ॥  
 कुस वनि मे शहारस ॥० ॥

तैलि यियि सु यार शायद,  
 यैलि वसि मे यावनस मद ।  
 यैलि मेलि यि पान नारस ॥  
 कुस वनि मे कथ शहारस ॥० ॥



नोन छुन मे कांह रँफीका,  
 पँज वथ मे हाविहेमा ।  
 व्वन्य सत ग्वरस बु प्रारस ॥  
 कुस वनि मे कथ शहारस ॥० ॥

हकीम स्यठा सु बुद्धिमान,  
 नबज़स दियहेम मे मीज़ान ।  
 कम कँच मे छिम शुमारस ॥  
 कुस वनि मे कथ शहारस ॥० ॥

सुय छु तँबीब म्योनुय,  
 दोद वारयाह छु प्रोनुय ।  
 दर्शुन दवा ब्यमारस ॥  
 कुस वनि मे कथ शहारस ॥० ॥

ज़ोनुम नु ज़ांह ल्वकचारस,  
 जज़ुर चाव मे बहारस ।  
 नरि व्वन्य दिवान छुस नारस ॥  
 कुस वनि मे कथ शहारस ॥० ॥

वेरि तँम्य सुंजि नेरु व्वन्य बो,  
 डेरु डेरु फेरु व्वन्य बो।  
 छांडन बु प्रथ कुनि गारस॥  
 कुस वनि मे कथ शहारस॥०॥

ऑशि मोत बिहिथ छु पानस,  
 रूठुम मे कथ बहानस।  
 जुव रोस क्या बु दारस॥  
 कुस वनि मे कथ शहारस॥०॥

महिमा छु हरद्वारस,  
 डेडि तल तँती बु प्रारस।  
 उपवास तँती बु दारस॥  
 कुस वनि मे कथ शहारस॥०॥

सोग छांडने बु द्रामुत,  
 चंदु छोन गरे बु आमुत।  
 क्याह बनि मे नाबकारस॥  
 कुस वनि मे कथ शहारस॥०॥



दर्शुन छु दास छारान,  
छ्वकु लद छु खून हारान ।  
पर फुट्य मै जानवारस ॥  
कुस वनि मै कथ शहारस ॥० ॥

दर्शुन छु म्वखतु हारा,  
ह्यमुहा तु छम नु हारा ।  
अनुग्रेह धनस बु प्रारस ॥  
कुस वनि मै कथ शहारस ॥० ॥

अनुग्रेह छु तेजु वुजमल,  
गालान छु त्रन दिहन मल ।  
गुलशन फवलान छि नारस ॥  
कुस वनि मै कथ शहारस ॥० ॥

ॐ

## मे बॅल्य अभिमान

मे रॉवमुच पननि पानुच ज्ञान,  
 मे बॅल्य अभिमान बु छुस कुसतान्य ।  
 हचर लद ड्यकु छुम पशेमान ।  
 मे बॅल्य अभिमान बु छुस कुसतान्य ॥०॥

बु यनु गोस छ्यनु निशि यारस,  
 मे लोग रस पापु व्यवहारस ।  
 मे रोवुम तनु धर्म तय ध्यान ॥  
 मे बॅल्य अभिमान बु छुस कुसतान्य ॥०॥

मे कोर अपजुय दोह्य व्यवहार,  
 मे गोबरोव पॉन्य पानस बार ।  
 मे मा ज़ोनुम यिना गव जान ॥  
 मे बॅल्य अभिमान बु छुस कुसतान्य ॥०॥

बु गोस तिरथन मे कॅर्य तति श्रान,  
 मे मा च़ोल तोति मनुक अग्यान ।  
 मे राह पानस कॅमिस लदु हान ॥  
 मे बॅल्य अभिमान बु छुस कुसतान्य ॥०॥

थ्यकुन लायख यि व्यवहार चोन,  
 छु कायायि मंज ति दरबार चोन ।  
 छु चोनुय पान अपान सुमरान ।  
 मै बॅल्य अभिमान बु छुस कुसतान्य ॥०॥

अँछन गाश चोनुय क्वठ्यन होश चोन,  
 मै वनतम मै निश छु क्याह तेलि म्योन ।  
 बु कथ सना प्यठ छुस नाहकय नचान ॥  
 मै बॅल्य अभिमान बु छुस कुसतान्य ॥०॥

मै बूज पाफ म्यॉन्य छुख चु गँजरान,  
 तु तँथ्य प्यठ न्याय छिहम अँजरान ।  
 लगी कथ वनतम अम्युक मीजान ॥  
 मै बॅल्य अभिमान बु छुस कुसतान्य ॥०॥





## मन मिलनाव

हा पानु दयि सुंज कल गॅनिराव,  
मन मिलुनाव भगवानस सुत्य ।  
वोन दितु जगतस नोन कति द्राव ॥  
मन मिलुनाव भगवानस सुत्य ॥०॥

बेदार गछ पानु वुछ प्रभाव आव,  
मुह अज्ञानुचि अँछ मुचुराव ।  
येति छुन रोजुन ती च्यतस थाव ॥  
मन मिलुनाव भगवानस सुत्य ॥०॥

हृदयस मंज प्रेम कुल व्वपदाव,  
नेति नेम अभ्यास सुत्य सगुनाव ।  
पंपोशि व्वंदुचे लंजि मुचुराव ॥  
मन मिलुनाव भगवानस सुत्य ॥०॥

द्रड सुत्य कुलिकी मूल वाहराव,  
च्यड सुत्य कुलिसुय ग्वड बरनाव ।  
येछि पछि हुंद अथ पयवंद त्राव ॥  
मन मिलुनाव भगवानस सुत्य ॥०॥

प्रथ द्वह अथ प्यठ थाव नज़रा,  
 ओरु योर पयवंद डोलमुत मा।  
 शम दम कैरयथुय ध्यान चुय थाव॥  
 मन मिलुनाव भगवानस सुत्य॥०॥

रसु खसि पयवंद येलि बरपूर,  
 काड कडि पानय लोलुच मूर।  
 ह्यसु रोज़ मोरि यिनु अँलरी वाव॥  
 मन मिलुनाव भगवानस सुत्य॥०॥

चंचल मन चोन रटि येलि करार,  
 फुलया कुल्यसुय लगि रंगदार।  
 व्वंदसुय मंज़ स्वय फुलया छाव॥  
 मन मिलुनाव भगवानस सुत्य॥०॥

ताब कर लाभुक नेरि अथ फल,  
 साधना चॉन्य ज्ञान अदु गँयि स्वफल।  
 फिलुहाल फलची कल मँशराव॥  
 मन मिलुनाव भगवानस सुत्य॥०॥

तपु ज़पु निशि 'अभिलाश' म्वखासुय,  
 करतस मनि मंज़ चुय वासुय।  
 बख्ति भाव प्रेरणा हृदसय त्राव॥  
 मन मिलुनाव भगवानस सुत्य॥०॥

## अँन्दरय लबुहन यार

अरमानन येलि करतल चुय दिख,  
अदु रटि दिल चोन करार ।  
पर तय पान येलि ह्युवुय ज्ञानख ॥  
परजुनावखु यि संसार ॥० ॥

सबरुच न्यामथ मनि आपरावख,  
दिल चोन लबि वुसजार ।  
बोल बोश पननुय श्वद येलि थावख ॥  
ख्वश करि चोन गुफतार ॥० ॥

लोलु सान पननी वुठ कुमलावख,  
प्रथि तेलि नोव मिलचार ।  
प्रेयमुक व्यवहार येलि वरतावख ॥  
थोद बनि चोन किरदार ॥० ॥

बेयि सुंज दग येलि पानु ललुनावख,  
सुय गव पर व्वपकार ।  
फलि फलि केँछा येलि पलि थावख ॥  
तेलि गछि जमा अंबार ॥० ॥



हक कॉन्सि हुंद येलि ख्योन चुय त्रावख,  
 सुय गव परेहजागार ।  
 साजु सुत्य अँन्दरयुम राग वुजुनावख ।  
 सुय गव बोड फनकार ॥० ॥

क्वसंग त्रॉविथ सतसंग प्रावख,  
 सुय गव बोड गाटुजार ।  
 दयि लोल बानन बॅर्य बॅर्य थावख ॥  
 दूर गछि योहय अन्धकार ॥० ॥

मनुकुय दरवाजु वोथ येलि त्रावख,  
 रथि खसि अदु चोन कार ।  
 विजि विजि दयि सुंद द्यान चुय दारख ॥  
 अँन्दरय लबुहन यार ॥० ॥



## अज़लु लोन

बु तंग ओननस अँम्य अज़लु लॉनी,  
 नँवुय लेखुन अज़ किताब म्यॉनी ।  
 मै ज़ायि गछि नतु ल्वकुट जवॉनी ॥  
 नँवुय लेखुन अज़ किताब म्यॉनी ॥० ॥

मै गम तु फिकरय चे शादमॉनी,  
 मै हालि बद गव बु छुस वदॉनी ।  
 वदुन वुछिथ म्योन चु छुख असॉनी ॥  
 नँवुय लेखुन अज़ किताब म्यॉनी ॥० ॥

अगर चु बोज़ख यि म्यॉन्य कहॉनी,  
 ल्यखिथ दिमय केह वनय ज़बॉनी ।  
 छया चे फुरसथ किनु वनु रवॉनी ॥  
 नँवुय लेखुन अज़ किताब म्यॉनी ॥० ॥

गँमुच छि दागल किताब म्यॉनी,  
 दर्ज छि अथ मंज़ दँलील प्रॉनी ।  
 अमल छि पतु वथ खराब म्यॉनी ॥  
 नँवुय लेखुन अज़ किताब म्यॉनी ॥० ॥

अमलन म्यान्यन सज़ा छि चॉनी,  
 मे करतु सज़हन चु नज़रि सॉनी।  
 बु रोज़ु ग्वन चॉन्य फ़कत ग्यवॉनी॥  
 नैवुय लेखुन अज़ किताब म्यॉनी॥०॥

मे क्याह छि गलती चु मा वनॉनी,  
 मलालु त्रावुम चु यारि जॉनी।  
 माललु त्राँविथ छि ज़ु दिल रलॉनी॥  
 नैवुय लेखुन अज़ किताब म्यॉनी॥०॥

खबर मे क्या गँयि यि ज़ीर चॉनी,  
 नौवुय रंगा छम छटान जवॉनी।  
 अंदर व्वंदस छुस बु च्यथ दिवॉनी॥  
 नैवुय लेखुन अज़ किताब म्यॉनी॥०॥

ग़ुहन छु लोगमुत यि छुन चलॉनी,  
 छि पाफ वाराह तु छिनु गलॉनी।  
 समर छु 'अभिलाश' अम्युक तुलॉनी॥  
 नैवुय लेखुन अज़ किताब म्यॉनी॥०॥



## जगतुच राजिरेन्य

गटि मंज मॉजी हावतम गाश,  
जगतुच राजिरेन्य मॉज दुर्गा।  
यॅच कॉज मनस छम यिहय अभिलाषा॥  
जगतुच राजिरेन्य मॉज दुर्गा॥०॥

अँछन छुम अंधकार बेयि छुस चोर,  
मॉजे कथ क्युत ओनथस योर।  
खोन्द्य छिम लगान वति चेशमन नु गाश॥  
जगतुच राजिरेन्य मॉज दुर्गा॥०॥

न्यबर ज़न नेरुहा वतिलूख छिम हेडान,  
अख अँकिस पानु वॉन्य तिम छि वनान।  
सुबहय छु द्रामुत फवलनय गाश॥  
जगतुच राजिरेन्य मॉज दुर्गा॥०॥

वति येलि छुस पकान अथु सॉर्य सॉर्य,  
कनि कतरि शुर्य छिम दिवान दॉर्य दॉर्य।  
वति पकुन म्योन बन्यव लूकु तमाशा।  
जगतुच राजिरेन्य मॉज दुर्गा॥०॥

महिमा चॉनी केंह छुस नु ज्ञानन,  
 महिमा चॉनी छे अंदर वीदन ।  
 ओन छुस परु किथु कॅन्य वीदु भाषा ॥  
 जगतुच राजिरेन्य मॉज दुर्गा ॥०॥

प्राने ज़नमुक्य छिम अगूर्य पाफ,  
 नॅ वुछुम ओबुर क्युथ नॅ वुछुम ताफ ।  
 नॅ वुछिम राथ किछ नॅ दुहुक गाशा ॥  
 जगतुच राजिरेन्य मॉज दुर्गा ॥०॥

आलव च़े दिमहॉय छुस ना बु चोर,  
 ज़्यनु गरि ज़ेवि म्यानि थोवमुत च़े तोर ।  
 चॉर्य सुंद बोल बोश ज्ञानन छि माता ॥  
 जगतुच राजिरेन्य मॉज दुर्गा ॥०॥

अॅछन छुम अंधकार ज़्यव म्याॅन्य नाबुकार,  
 ज़िन्दगी म्याॅन्य वनतु तैलि कथ लगहार ।  
 अथु डालुम नेत्रन म्यान्यन यियि प्रकाश ॥  
 जगतुच राजिरेन्य मॉज दुर्गा ॥०॥

पजि दिल् कांह नाय छुम करान रफाकथ,  
 सॉरी अपजुय छिम रछान च्यथ ।  
 नखि डखि रोजतम नतु गछु निराशा ॥  
 जगतुच राजिरेन्य मॉज दुर्गा ॥०॥

‘अभिलाश’ छुय करान वननस वाये,  
 करमु गथ छस मा तमि आये ।  
 व्यवहारस मंज छु ज़िन्दु जुव लाशा ॥  
 जगतुच राजिरेन्य मॉज दुर्गा ॥०॥





## व्यतरावुन प्योम

तनु गव यॅचकाल यनु दय छ्यनु गोम,  
 वनु कस क्रूठ व्यतरावुन प्योम ।  
 मै गुलालु पानस कालु रंग ज़न गोम ॥  
 वनु कस क्रूठ व्यतरावुन प्योम ॥० ॥

छटि कडनय अडु वति त्रॉविथ गोम,  
 शुरय पानस द्वु गॅल्य वाव प्योम ।  
 द्वु प्राचन तनु ज़ांह मा स्रेह गोम ॥  
 वनु कस क्रूठ व्यतरावुन प्योम ॥० ॥

सॉविथ थोवनस त्रॉविथ कस गोम,  
 आलव दिय दिय होट तान्य बिगर्योम ।  
 बूज़ुन नु शायद आलव छोट गोम ॥  
 वनु कस क्रूठ व्यतरावुन प्योम ॥० ॥

छ्यफ दिथ यनु प्यठु मॅशरॉविथ गोम,  
 ख्यथ च्यथ सोरुय तनु वॅस्य प्योम ।  
 वेह प्योम अन्दरी जिगरस हेह गोम ॥  
 वनु कस क्रूठ व्यतरावुन प्योम ॥० ॥

गव कथ शहरस काँन्सि मा ड्यूंठुम,  
 पाँगाम तँम्यसुंद कांह वँन्यतोम ।  
 सौत गोम पानस प्रुछनय कोत गोम ॥  
 वनु कस क्रूठ व्यतरावुन प्योम ॥०॥

खसवुन ल्वकचार हय हय वँस्य प्योम,  
 फवलवुन गुलज़ार व्वह्य बरु गोम ।  
 हरदुन परतव अचुवनि सोंतु प्योम ॥  
 वनु कस क्रूठ व्यतरावुन प्योम ॥०॥

खूनुक रिशतय यनु प्यठु संग गोम,  
 दुनिया तनु प्यठु पननुय तंग गोम ।  
 सबरुक प्यालु चोम चोन सख द्योठ प्योम ॥  
 वनु कस क्रूठ व्यतरावुन प्योम ॥०॥

ज़लुरय सुंद ज़ालुय यनु प्यठु नॉल्य गोम,  
 तनु प्यठु सोरुय नचुन बंद गोम ।  
 खुरय दार ज़ालस वारय श्रुख गोम ॥  
 वनु कस क्रूठ व्यतरावुन प्योम ॥०॥

वँद्य वँद्य यँचकाल चेशमन गोट गोम,  
 रछ मा ज़रु ज़रु तस ज़ांह गोम ।  
 लटि अकि दर्शुन द्युन तस दँप्यतोम ॥  
 वनु कस क्रूठ व्यतरावुन प्योम ॥०॥

## जटादर शिवु शंकर

बु छुस आमुत बरस तल वुछ गदागर,  
मुचर बर ही जटादर शिवु शंकर ।  
बरस ठुक ठुक मे कोर वापस सदा कर ॥  
मुचर बर ही जटादर शिवु शंकर ॥० ॥

खँटिथ ब्यूठुक रँटिथ क्वह तय बयाबान,  
गुतुल शीना छु बाक्य पूर सुंसान ।  
खबर ऑसुम येत्यन आसि बारु बोड शहर ॥  
मुचर बर ही जटादर शिवु शंकर ॥० ॥

चे रँटमुच जाय छय प्यठ बालु थ्वंग्यन,  
कुनुय कीवल बिहिथ छुख मा चु खोचन ।  
मे नठ नठ चायि येति छु तुरि कहर ॥  
मुचर बर ही जटादर शिवु शंकर ॥० ॥

बु छुस न्यबर चु छुख ग्वफायि अंदर,  
चे क्या अँन्दरय बिहिथ न्यँबरिम छि खबर ।  
बु सौरुय शैछ वनय दिम अचनु अंदर ॥  
मुचर बर ही जटादर शिवु शंकर ॥० ॥



छु प्रवु त्रावान चोनुय शीनु बिसतर,  
 वुछिथ अथ कुन लगान नज़रन छि टकर।  
 यि छा शीनुथ ति किनु छुय संगि मरमर॥  
 मुचर बर ही जटादर शिवु शंकर॥०॥

चे रँटमुच तालि प्यठ गंगायि हुंज दार,  
 चे रोसतुय कौन्सि मा ह्योकमुत अम्युक बार।  
 अवय किन्य नाव प्योमुत छुय गंगादर॥  
 मुचर बर ही जटादर शिवु शंकर॥०॥

छु कोताह क्रूठ तय बेयि ज्यूठ सफरा,  
 चु थौविथ थज़रु प्यठ जगतस ति नज़रा।  
 मे मुखस मा अमिच केह ओस खबर॥  
 मुचर बर ही जटादर शिवु शंकर॥०॥

खबर अँसुम चु छुख बिलकुल ग्वसौनी,  
 मगर जगतस करान छुख हुकुमरौनी।  
 चे प्यतरावन्य खबर कुत्याह छि अंबर॥  
 मुचर बर ही जटादर शिवु शंकर॥०॥

अकुय 'अभिलाश' छु अभिलाश चरा चर,  
 बनून मन म्योन गोछ चोन लोलु मंदर।  
 करार ननिवानु येति करि पानु ईशर॥  
 मुचर बर ही जटादर शिवु शंकर॥०॥

## फॅरययाद

मे चाने डेडितल त्रुवुय पनुन सर,  
 चु बोज़ फॅरययाद जटादर शिवु शंकर ।  
 बु छुस नैशिब्वद दया सागर दयाकर ॥  
 चु बोज़ फॅरययाद जटादर शिवु शंकर ॥०॥

युथुय ज़न ध्यान चोनुय छुस बु दारन,  
 त्युथुय गतु ग्यूर लगन म्यान्यन व्यचारन ।  
 वॅनिथ कस ह्यकु मे सपदान बस योहय वर ॥  
 चु बोज़ फॅरययाद शिवु शंकर ॥०॥

रुमा अख छ्यन छुमा आम्यन खयालन,  
 अखा अडु मोर गॅछिथ ब्याखा छु व्वतलन ।  
 छि लॅग्यमित्य तंदलि यिम ज़न रूदु बुबर ॥  
 चु बोज़ फॅरययाद जटादर शिवु शंकर ॥०॥

छि कॉचाह तेज़ रफतार अथ व्यचारस,  
 नॅ छस पखु तय नॅ जंगय निराकारस ।  
 रॅटिथ थावुन चॅटिथ त्रावुन सरासर ॥  
 चु बोज़ फॅरययाद जटादर शिवु शंकर ॥०॥

छु द्युतमुत नागु वुजने ज़न मै आलव,  
 बैरिथ नैट्य नारि थविनम मस खयालव ।  
 स्वचर ज़ांह छुस नु छस वुज्जन्या बराबर ॥  
 चु बोज़ फ़ैरययाद जटादर शिवु शंकर ॥०॥

दपान छुम वुछ यि दुनिया क्या छु ब्येहतर,  
 सु कैम्य वुछ युस न न्यैतरव वुछ ज़रा बर ।  
 ब्रमस अँथ्य प्यठ छु ब्रमुरावान अकसर ॥  
 चु बोज़ फ़ैरययाद जटादर शिवु शंकर ॥०॥

छि अँम्य सुंज काँम वथ डालुन्य मै अकसर,  
 गमव फिकिरव चँटिथ त्रैवुस मै फुट्य पर ।  
 अँमिस यावुन लगान मेय आव बुजर ॥  
 चु बोज़ फ़ैरययाद जटादर शिवु शंकर ॥०॥

मै छम गलती बू छुस माँनिथ सरासर,  
 तवय गोमुत चु छुख मेय कुन फिरिथ थर ।  
 छि सन्तानन किती वँथ्य माँल्य सुंघ बर ॥  
 चु बोज़ फ़ैरययाद जटादर शिवु शंकर ॥०॥



बु चोन सन्तान चु छुख ना म्योन ईशर,  
 चु मॅरयादा पनुन्य थवसॉ बराबर ।  
 बु मा डलु वति अथन म्यान्यन चु थफ कर ॥  
 चु बोज़ फॅरययाद जटादर शिवु शंकर ॥०॥

गोमुत 'अभिलाश' गिरिफतार ग्रेह गतस मंज़,  
 प्योमुत सरि राह चॉनिस वॅहदतस मंज़ ।  
 छॅरिस बानस छु छांड़ान लोलु बॅरचर ॥  
 चु बोज़ फॅरययाद जटादर शिवु शंकर ॥०॥

ॐ

## पूजा बु चॉनी क्या करय

आधार जगतुकि शंकरय,  
 पूजा बु चॉनी क्या करय।  
 व्यनती चु बोझ म्योनय औरचरय॥  
 पूजा बु चॉनी क्या करय॥०॥

पूजा छि चॉनी बखित बाव,  
 तमि कुय मे हृदयस छुम अभाव।  
 बासान मे छुम सोरुय परय॥  
 पूजा बु चॉनी क्या करय॥०॥

तफ जफ कॅरिथ प्रजुनावुहथ,  
 हृदयस अंदर बेहनावुहथ।  
 ज्ञान मा मे तमिची छम ज़रय॥  
 पूजा बु चॉनी क्या करय॥०॥

येछि पछि सुत्य मनु नावुहथ,  
 ललनावुहथ रंजुनावुहथ।  
 मायि चानि हुंघ कम संज करय॥  
 पूजा बु चॉनी क्या करय हुन्दय॥०॥

कलि चानि युथ गालि न्यँन्दुर तु नेह,  
 पूरन मे बास्यम चोन सेह।  
 अचहख चु योदवय म्योन गरय॥  
 पूजा बु चॉनी क्या करय॥०॥

स्वकर्म छि चॉन्य व्वपासना,  
 धर्मच छे वथ चॉन्य साधना।  
 कमि आनु पूजथ शंकरय॥  
 पूजा बु चॉनी क्या करय॥०॥

रंगदार पोशन गोंद्य कॅरिथ,  
 चरनन बु थवहय च़ेय जॅरिथ।  
 व्योद छुम नु मनथर कुस परय॥  
 पूजा बु चॉनी क्या करय॥०॥

थलि थलि मुदया स्योद कॅरिथ,  
 फलि फलि म्वखतु थवहय जॉरिथ।  
 शेरस बु लोलुक ओश जरय॥  
 पूजा बु चॉनी क्या करय॥०॥



पादन बु चान्यन गथ दिमय,  
 मथ छुम गछान ह्यथ क्या यिमय ।  
 अनुग्रेह छु चोन म्योन आसरय ॥  
 पूजा बु चॉनी क्या करय ॥० ।

कर्मक ख्वचर ब्वजि हुंद छ्वचर,  
 यिकुवटु रॅलिथ तुलहम मचर ।  
 नेशि ब्वद प्योमुत छुस शेशदरय ॥  
 पूजा बु चॉनी क्या करय ॥० ॥

यी चुय दिहम ती छुम प्रमान,  
 स्वख द्वख मे गोछ बासुन समान ।  
 वर दिम मे नतु शर ह्यथ मरय ॥  
 पूजा बु चॉनी क्या करय ॥० ॥

‘अभिलाश’ रोट गरु गांगले,  
 मन छुस तवय छलु छांगरे ।  
 मॅशरावतस यिम अरुसरय ॥  
 पूजा बु चॉनी क्या करय ॥० ॥



## बु पोश लागय

मे वनि कॅडमख चु जेरि जेरे,  
 चु योद चलख व्वन्य मे चोन फेरे।  
 बु रोज़ कलु दिथ अथ चानि हेरे॥  
 बु पोश लागय च़े मॉज शेरे॥०॥

मे लोलु किन्य मॉज रोटुय च़े दामन,  
 चु युथ नु त्रावख लगय बु पामन।  
 मे नाय दिलुक शर तेलि ज़ांह नेरे॥  
 बु पोश लागय च़े मॉज शेरे॥०॥

मे छम व्वंदस कल वुछथ चु वारय,  
 बु पान पननुय च़े डालि खारय।  
 यि पान अरपन छु चानि वेरे॥  
 बु पोश लागय च़े मॉज शेरे॥०॥

बु शोक पनने च़े पाद छलहाय,  
 तु लोलु पनने च़े प्राण वंदुहाय।  
 यि जुव छु चोनुय मे क्याज़ि फेरे॥  
 बु पोश लागय च़े मॉज शेरे॥०॥

बु पूजि लागय पनुन्य न्यँथुर चै,  
 चु मौज अनवॉर्य ग्वडुन्य दितय मे।  
 नतय मे मौजी क्वकाल गेरे ॥  
 बु पोश लागय चै मौज शेरे ॥०॥

रंगा रँगी बु व्वलासु करुहॉय,  
 चै तारकन हुंजु बु चूनि जरुहॉय।  
 छु गथ करान सिरयि अथ चानि शेरे ॥  
 बु पोश लागय चै मौज शेरे ॥०॥

मे चानि दर्शनु यिन बानु बरनय,  
 चै रुम रुम म्यॉन्य नेति नेयम स्वरनय।  
 मे द्वख चलन मौज अकि चानि जेरे ॥  
 बु पोश लागय चै मौज शेरे ॥०॥





## चानि लोलुच रेह

परमीशर रामीशवरु जगथ ईशर भगवन,  
 चानि लोलुच रेह मे गँडनम देंज शॅरीरस हन हन।  
 चॉन्य दूरिरन सूर कोरनम छुस बु संकट बूगन॥  
 चानि लोलुच रेह मे गँडनम देंज शॅरीरस हन हन॥०॥

लोलु पनने चानि डेडि तल अज बु आमुत छुस शरन,  
 चानि दर्शनु त्रफ मे सपदन त्रेशि हॅत्य अन्ता करन।  
 त्रेशि हॅत्यसुय मे नेशुनावतम छ्यन मे लगिहम ज़नमन॥  
 चानि लोलुच रेह मे गँडनम देंज शॅरीरस हन हन॥०॥

ज़नमादिक गॅयि मे वाराह जामु नॅव्य नॅव्य छुस वलन,  
 होंज़ु या रादु प्रथ जामस पुर मे दोहय छुम प्यवन।  
 पुशि त्रॅव्य त्रॉव्य वुछ बराबर तोति कांह मा छुम यिवन॥  
 चानि लोलुच रेह मे गँडनम देंज शॅरीरस हन हन॥

परयुथनु पैयि मे अथ जामस त्युथ मे व्वसताद हावतन,  
 मीच लॉगिथ शूबि युथ ज़न तिछ सु करिह्वास कपटन।  
 बु ति यिमुहा अथि ह्लू ज़न रथि खारिह्वाम मे जामन॥  
 चानि लोलुच रेह मे गँडनम देंज शॅरीरस हन हन॥०॥

सुय मे दियिह्यम तिछ अठकल जामु रोज़िह्यम न्यरमल,  
 छुय डलस अंदर ज़लस यिथु कॅन्य रूज़िथ कंवल।  
 दाग कर्मन हुंघ नु लगुहन जामु लॉगिथ प्रचरन॥  
 चानि लोलुच रेह मे गँडनम देंज़ शॅरीरस हन हन॥०॥

वॅरियि वादुय गॅयि मे छारन ओश हारन छुस पशन,  
 कमि वानय बु छलुनावन अथि कुनि मा छुम यिवन।  
 कर व्वपाया चु पानु म्योन्य जामु म्योन आव व्वन्य रुनन॥  
 चानि लोलुच रेह मे गँडनम देंज़ शॅरीरस हन हन॥०॥

तिछ गथा हाव व्वन्य वथा चुय तपु र्योश बनिह्यम यि मन,  
 वछि वॉलिंजि कचि रूज़िथ चॉन्य करिह्यम यि सुमरन।  
 दिल छु दर्पन यस साफ रोज़न सुय छु तथ मंज़ चे वुछन॥  
 चानि लोलुच रेह मे गँडनम देंज़ शॅरीरस हन हन॥०॥

लथ बु दिमुहा संसारस कथ म्यॉन्य बोज़िहे नु कांह,  
 छुस बु खोचन पाँचन यारन तिम छि आसन मे प्रारन।  
 काम, क्रूध, लूब, मूह अहंकार यिम छि बेडि ह्यथ मे छारन॥  
 चानि लोलुच रेह मे गँडनम देंज़ शॅरीरस हन हन॥०॥

संग चेंदय रंगु रंगु कोताह मे छिम यिम तंग करन,  
 कथ करनय वथ छि डालन ब्वद छि गालन मनशन।  
 लूख खसुहन स्योद स्वर्गु द्वारस यिम अगर नु येति आसुहन॥  
 चानि लोलुच रेह मे गँडनम देंज शँरीरस हन हन॥०॥

‘अभिलाशस’ छु ख्यूबस मन तोर क्युत स्यठा निर्धन,  
 अभिमानुक कलु त्रॉविथ तल छु चान्यन चरनन।  
 कर्मलोन म्योन पनुन्यव अथव वरकु वरकय शेरतन॥  
 चानि लोलुच रेह मे गँडनम देंज शँरीरस हन हन॥०॥





## सँच

आशायि हुंजय व्रँच दर्यम सँच मे कर्यम अरमाननुय,  
 कमि रंगु मे ईशर सरु कर्यम केह मा बु ती छुस ज्ञाननुय ।  
 दाथुर मे वाहर्यव सातु सान पातुर वुछिथ पयमाननुय ॥  
 कमि रंगु मे ईशर सरु कर्यम केह मा बु ती छुस ज्ञाननुय ॥० ॥

सबरस छि तलखी सिबरि हिश दय गोछ रछुन मेति किबरु निश,  
 अँन्दरी दिलस छम फिकिर हिश कर चलि मनस मलुची यि मिश ।  
 छलु वॉल्य कम कम बलुवीर पँथरिस पॉव्य अभिमाननुय ॥  
 कमि रंगु मे ईशर सरु कर्यम केह मा बु ती छुस ज्ञाननुय ॥० ॥

वुन्य वुन्य दिलस दिचोम दिलासु रछ खंड अन्योम यि राहि रास,  
 छ्यफ दिथ मे ओस कुसतानय शाफ थफ दिथ चोलुम ह्यथ विशवास ।  
 दिथ निथ मे रोटनम हिथ येहय लिथु खुर गँयम व्यचारनुय ॥  
 कमि रंगु मे ईशर सरु कर्यम केह मा बु ती छुस ज्ञाननुय ॥० ॥

मँदरेर मे बास्योम ओस अथ अँदरेर गव तथ गॉल्यथुय,  
 खॉलिथ दानस प्यठ यि देग रेह गँयि यि तरकॉर्य जॉल्यथुय ।  
 मारुन मे ह्योत व्वन्य पान पोतुस क्रारुन बोथ येलि बाननुय ॥  
 कमि रंगु मे ईशर सरु कर्यम केह मा बु ती छुस ज्ञाननुय ॥० ॥

अंबरस दप्योम लागु लाकु सौर्य नंबरस मे केह आयम नु वौर्य,  
 कंबरस मे ड्वख चायम बिहिथ हौरिथ बु छुस अनजान जौर्य।  
 कथु रोजु तिहुंजय पथ कुनथ वथ यस हौव भगवानुनय॥  
 कमि रंगु मे ईशर सरु कर्यम केह मा बु तीछुस ज्ञाननुय॥०॥

ताँसरि छु रोटमुत नालुमति ताँबीर ज्ञानन वालिवुय,  
 तकदरिसुय थोवमुत छु मटि सोरुय मगर बेह वालिवुय।  
 तदबीरु सुत्य वस खोर व्वटि मंज दून अथन ग्वनुवानुनय॥  
 कमि रंगु मे ईशर सरु कर्यम केह मा बु ती छुस ज्ञाननुय॥०॥

अनुहौर्य अरमान गॅयि नु वरि करि सँच मे अपजय पानुसुय,  
 ओश वोथ मे चेशामन यिथु कन्यथ दँज ठरि मे थँव असमानसुय।  
 बे गम छु हर दम सुय बिहिथ यस छुन ख्वचर परमाननुय॥  
 कमि रंगु मे ईशर सरु कर्यम केह मा बु ती छुस ज्ञाननुय॥

संकूच तस क्या आव यूत खताह मे खोतमुत क्या छु त्यूत,  
 तमहस मे योद अनिहेम जमाह सोम्बरिथ ति ओस तँमिसुय क्युत।  
 बूजुम छु रूशिथ पूर पौठ्य केह छुन वुनि सु मानुनय॥  
 कमि रंगु मे ईशर सरु कर्यम केह मा बु ती छुस ज्ञाननुय॥

ज्यूठ सफरा छु क्रूठ मँजिल गोछ रँहबरा कांह रुत मे प्योन,  
 कुल तारकन छम ग्रंद करुन्य द्दछि द्दछि मे छुम दँर्याव चोन।  
 स्यद मे करि अथ कुस सु मनथुर ती छुस प्रछान व्यदुवानुनय॥  
 कमि रंगु मे ईशर सरु कर्यम केह मा बु ती छुस ज्ञाननुय॥



## वनि कुस

शय छम प्रय गनि पय वनि चोन,  
 वनि कुस आगुर कोताह छु प्रोन।  
 दय करि खय छेनि मन प्रेनि म्योन॥  
 वनि कुस आगुर कोताह छु प्रोन॥०॥

रेशि छोट त्रेशिहोत वुनि केशान,  
 डेशिहन सूरमोत सर्व शक्तिमान।  
 त्रेशिहोत केशिवुन पेशि रूद म्योन॥  
 वनि कुस आगुर कोताह छु प्रोन॥०॥

मुचरिथ वनिहम पोश ज़न पुचरिथ,  
 छेचरिथ थावुहा ती रँछरिथ।  
 पानु ज़ानि बानु छा लगुहार म्योन॥  
 वनि कुस आगुर कोताह छु प्रोन॥०॥

मोचरिथ त्रोवनस मोत ज़न मँचरिथ,  
 सोचरिथ त्रोवनस यँच नँचरिथ।  
 छोरिथ होरिथ दोरिथ छुस मौन॥  
 वनि कुस आगुर कोताह छु प्रोन॥०॥



व्यचरिथ थवहा ती व्वन्य व्यपरिथ,  
 त्रोपरिथ दारि बर निमहा श्रोपरिथ ।  
 व्वफरिथ यियिहेम द्यवु लोल चोन ॥  
 वनि कुस आगुर कोताह छु प्रोन ॥० ॥

ग्वफि मंज निमहा ती बु ज़ोपरिथ,  
 नॅशरिथ मॅशरिथ सोरुय पुशरिथ ।  
 सोज़ि दिल बोज़िहे द्वहु अकि म्योन ॥  
 वनि कुस आगुर कोताह छु प्रोन ॥० ॥

गरु चोन ज़ांह मा तोग मे अचनुय,  
 ज़ायि गव दुांनेयिहस म्योन नचनुय ।  
 वनुवुन वचनुय मा तोगमुय चोन ॥  
 वनि कुस आगुर कोताह छु प्रोन ॥० ॥

सुय वनि यस बनि अनुग्रेह चोन,  
 सिरयि तस प्रज़लान आसि ड्यकु लोन ।  
 लोलु सान बोलि सुय महिमा चोन ॥  
 वनि कुस आगुर कोताह छु प्रोन ॥० ॥

## वनु जोग्यो

वंजनु रौसतुय पजनु पेठ्य छुस बु अनजान,  
वनु जोग्यो मन किथु रोज़ि साविदान।  
ख्यनु मातर ज्यनु प्यठु छुम नु ठँहरान॥  
वनु जोग्यो मन किथु रोज़ि साविदान॥०॥

लूब सुत्यन मन छुम ख्यूबस गछान,  
साज़ राजुक तेलि छुम लूपस गछान।  
अँगनु रौसतुय व्यँगनु सुत्य देह छुम दजान॥  
वनु जोग्यो मन किथु रोज़ि साविदान॥०॥

क्रूधु सुत्य छुम रावान दिलुकुय सरूद,  
शांत भावस दावस लागान व्यरूद।  
द्वह द्वखचे ड्यकुसुय छम मे व्वपदान॥  
वनु जोग्यो मन किथु रोज़ि साविदान॥०॥

मोह म्योनुय क्रुह वादन छु फेरन,  
अरु ओननस वरदार शाह ज़ोरन।  
न्यँन्दरि अदंर ति यँन्दरेय छम परेशान॥  
वनु जोग्यो मन किथु रोज़ि साविदान॥०॥

कामु दीवन रामु नाव मॅशरोवनम,  
 ब्रमरोवनम मन येलि छॅलरोवनम।  
 रसु रसय ह्यसु कवु यि व्यसरावान॥  
 वनु जोग्यो मन किथु रोज़ि साविदान॥०॥

अहंकारन नियि रॅटिथ पॉर्यज्ञान म्यॉन्य,  
 कर्म खंड्यथ व्वदयस आयम प्रॉन्य।  
 छिनु लोलस मेय निशि पॅद्य ठॅहरान॥  
 वनु जोग्यो मन किथु रोज़ि साविदान॥०॥

पॅज छि क्वदरथ बासि तस आसि वेशवास,  
 वतु चाने स्यज़ु कथु यिन तस रास।  
 करि अनुभव गरि गरि रोज़ि च़रच़ान॥  
 वनु जोग्यो मन किथु रोज़ि साविदान॥०॥

पज़ि प्रेयमय यस आसि चोनुय तलाश,  
 ध्यान अँन्दर्य तस वुज़ि ज़ानुक प्रकाश।  
 ज़ानु यँन्द्रेय पानु वुज़ुनावि तस ज़ान॥  
 वनु जोग्यो मन किथु रोज़ि साविदान॥०॥



गरि पनने बर दिथ छुय च़े भगवान,  
 कोनाह ज़ीवो गरुसय बरु च़ु मुच़रान ।  
 बर मुच़रिथ ह्यर खसनुच छि यज़दान ॥  
 वनु जोग्यो मन किथु रोज़ि साविदान ॥०॥

तपु ज़पुके शफ़ु खस पावि पावे,  
 शर्म कुय गुम चोन रुम रुम नावे ।  
 प्रणु मनुके रयन रोज़ नखु वालान ॥  
 वनु जोग्यो मन किथु रोज़ि साविदान ॥०॥

पन ओमकी मन रोज़ि येलि खारान,  
 दुफ दज़ि तय रुफ रोज़ि पानु प्रज़लान ।  
 बनि पूरन ननि तस क्या छु भगवान ॥  
 वनु जोग्यो मन किथु रोज़ि साविदान ॥०॥

नज़रि चाने कर्मच व्यद छि बदलान,  
 तपु रेशनुय साधना स्यद छि सपदान ।  
 मूलु मूर्खन द्वद हिश ब्वद छि प्रज़लान ॥  
 वनु जोग्यो मन किथु रोज़ि साविदान ॥०॥

ज्ञानि क्वदरथ मानि कर म्यॉन्य व्यनती,  
 करि पूरन मन प्रावि थेंज उनती ।  
 ज्यनु प्यठुय मनु किन्य छुस बु केशान ॥  
 वनु जोग्यो मन किथु रोज़ि साविदान ॥०॥

‘अभिलाशस’ असलुच डेंज पॉर्यज़ान,  
 वॉर्य रॉवुस तमिकुय द्वख छु बूगान ।  
 खॉर्य खॉली ग्रटु बॅल्य नचुनावान ॥  
 वनु जोग्यो मन किथु रोज़ि साविदान ॥०॥

ॐ

## मे वोद कोताह

स्योद स्योद येलि नु चे बूजथ म्योन ज़ांह,  
अदु मतु बोज़तु मे वोद कोताह।  
दोद म्योन बदनुय स्योद मा रूद ज़ांह।।  
अदु मतु बोज़तु मे वोद कोताह।।०।।

आलव चे दितमय सुबुहू तु शामय,  
व्यथ आयि ह्यथ मे लुकु पामय।  
व्यसु मरु ह्यसु रोस वनु बो कस क्या।।  
अदु मतु बोज़तु मे वोद कोताह।।०।।

वुछि कुस म्यॉनिस दिलुकिस हालस,  
लुख छि वुछान म्यानिस खतु खालस।  
चे रोस बैयि कस अँन्दरिम छि पताह।।  
अदु मतु बोज़तु मे वोद कोताह।।०।।

शायि चानि सूज़मय पॉगाम कॉत्याह,  
दयि ज़ांह च़ेय निशि तिम वॉत्याह।  
रय च़ाम बदनस प्रय म्यॉन्य छय मा।।  
अदु मतु बोज़तु मे वोद कोताह।।०।।



बिहुन छुय चें मुशकिल विहुन छुन मै गोंडमुत,  
 पानि रोस पृथवी सीनु ज़न फोटमुत ।  
 बूद चोन सूद मंद रूध ह्युव अथ दवा ॥  
 अदु मतु बोज़तु मै वोद कोताह ॥०॥

वतनुय म्यान्यन कतु गड कोरमुत,  
 मोर छुम इसतादु फोर मोरमुत ।  
 विल चलि दिल ह्यथ सुय गव अलविदाह ॥  
 अदु मतु बोज़तु मै वोद कोताह ॥०॥

व्यखती रंग वुछ मै चॉनिस लोलस,  
 यस पोशि तस खारि अरशि अवलस ।  
 नम यस चुय रटख अदु गम तस छु क्या ॥  
 अदु मतु बोज़तु मै वोद कोताह ॥०॥



## अनुहारु चाने

रोतुलि मे ज़ोतुवुन वुछ क्याहतान्य अनहारु चाने,  
लालव किन्य चालि औश वौथ अँछ ज़ु दरैय नु म्योन ।  
रुमु रुमु मे गुमु वसान गँयि ताफ प्यव ज़न शीनु माने ॥  
भय छुम अथ क्या छु निरनय वनतम चु टाठि म्याने ॥०॥

व्यगलिथ बु शकलि सुत्य प्योस अमि अँगनुके प्रकाशे,  
वाहु वाहु मे शाह खसान ओस दय ज़ानि कँहुंजि आशे ।  
शिठ ज़न वुठन गोव म्यॉन्यन क्रुथ कोड नु ज़ेवि म्याने ॥  
रोतुलि मे ज़ोतुवुन वुछ क्याहतान्य अनहारु चाने ॥०॥

नब युथ प्रकाश शोल्योव तीज़स यैलि द्राव वाशे,  
शबु अन्दरु लबनु आव मे ज़न ओस दुहुल्य गाशे ।  
राह मा खसयम मे पान्स क्याह दिम मिसालि चाने ॥  
रोतुलि मे ज़ोतुवुन वुछ क्याहतान्य अनहारु चाने ॥०॥

औबरन सु गोबरु सुंघ पॉट्य ख्वनि मंज़ रँटिथ खँटिथ थोव,  
यनु तारकन अंदर गोव तनु ज़ांह नसॉ सु नौन गोव ।  
गुफ ज़न सु वुफ तुलिथ गोव अमि अँछ टिटुवारि म्याने ॥  
रोतुलि मे ज़ोतुवुन वुछ क्याहतान्य अनहारु चाने ॥०॥

रय ज़न मे गोम अकले प्रज़निथ ह्योकुम नु शकले,  
 दय मा योहय ओसुम पय गोम स्व विज़ येलि म्वकले।  
 वय लोलुकुय बराबर ओसुम नु देगि म्याने॥  
 रोटुलि मे ज़ोटुवुन वुछ क्याहतान्य अनहारु चाने॥०॥

रेय ज़न लँजिम शँरीरस खेय गोम मे मचि न्यँन्दरे,  
 फिर्य लँग्य मे रॉत्य रातस वथरुनि छुनिख मे दँतरे।  
 बंदु बंदु वुछुम मे पानस रथ ज़न गोमुत मे बाने॥  
 रोटुलि मे ज़ोटुवुन वुछ क्याहतान्य अनहारु चाने॥०॥

ह्युर हौख वदान वदान मे शुर ज़न ल्वकुट बु छ्यनु गोस,  
 फोर ओस फ्रकान मे अवलय कवु चालि बारु द्वख प्योस।  
 बालु पान यि गालि मा व्वन्य दादि चानि हा ग्वसाने॥  
 रोटुलि मे ज़ोटुवुन वुछ क्याहतान्य अनहारु चाने॥०॥

मन छुम स्यठा मे व्याकुल द्वह राथ छुस परेशान,  
 ओस क्याह सु म्यूठ सोपना गरि गरि द्वहय वुछिहान।  
 वछि तलु कजोम यि तँछ तँछ अँछ मा लजस म्याने।  
 रोटुलि मे ज़ोटुवुन वुछ क्याहतान्य अनहारु चाने॥०॥



द्रुय छय चै म्यॉन्य चुय वन दुय क्या गँयी चै म्यॉनी,  
 क्वसु कथ छि यीच ज़ाँविज य्वसु ज़न मे चॉन्य नु मॉनी।  
 शक छुम मे दादि चाने अँछ मा गछन मे काने॥  
 रोटुलि मे ज़ोटुवुन वुछ क्याहतान्य अनहारु चाने॥०॥

काँछिथ यि परदुपूशी बाँसिथ ह्योकुम नु काँन्से,  
 कस वन यि आँब पननुय डीशिथ ह्योकुम नु वाँन्से।  
 पुशनय यि पापनुय हुंज ज़ाँह मा यि म्यॉन्य प्राने॥  
 रोटुलि मे ज़ोटुवन वुछ क्याहतान्य अनहारु चाने॥०॥

वाँफिर योद गाटुजार चोन गॉफिलस अगर मे रोज़िहे,  
 बुरज़न अंदर 'अभिलाश' बावथ पनुन्य चै सोज़िहे।  
 सार्योम नु केँह मे लार्योम थदि कारखानु चाने॥  
 रोटुलि मे ज़ोटुवन वुछ क्याहतान्य अनहारु चाने॥

४०८३

## अनुग्रेह पनुन अनुभावतम

वसि मंज बु थवु तसलाह बोरुत मस अज मोदुर सुय चावतम,  
 खसि लोलु बानन युथ मे ग्रख बख बख करन वुजुनावतम।  
 चलि शक मे सोरुय अज तेली प्रत्यक्ष चुय केह हवतम॥  
 अनुभावतम अनुग्रेह पनुन, अनुग्रेह पनुन अनुभावतम॥०॥

दजि नार दिलकिस दानसुय सुय जालि म्यानिस अज्ञानसुय,  
 रेह मारि छवह प्रथ बानसुय अदु फेरि वुशनेर मे पानसुय।  
 मुछिं रोजि दुहि निशि लोलु रेह सुय नेह मे चुय हैछिनावतम॥  
 अनुभावतम अनुग्रेह पनुन, अनुग्रेह पनुन अनुभावतम॥०॥

यिनु जोश हमि अथ पौश नारस होश तियुथ मे थावतम,  
 मंज गट पछस वुछ पुनिम चन्द्रम बौश तिछय मे हावतम।  
 पानस अन्दर दानस प्यविथ बानस बैरिथ केह थावतम॥  
 अनुभावतम अनुग्रेह पनुन, अनुग्रेह पनुन अनुभावतम॥०॥

म्वछि फोल पनुन वछि मंज रँनिथ ब्वछि होत बु कुनि विजि ख्यावुह्य,  
 छिम नो वसुफ हावय कसुब बैयि बैयि तु बैयि मंगु नावुह्य।  
 पौर्य लगुहय चौर्य स्वन्दरन ग्वडु मेय चुय करनावतम॥  
 अनुभावतम अनुग्रेह पनुन, अनुग्रेह पनुन अनुभावतम॥०॥

ल्वय ख्वय रँटिथ चोन द्यकरि मंज पाकस बु थवु सुय फिकरि मंज,  
 द्वछि द्वछि रँटिथ मनथुर म्वलुल्य पछिदार तिम त्रावस बु मंज ।  
 नचि बानसुय मंज भावु रस पचि मन मे युथ त्युथ चावतम ॥  
 अनुभावतम अनुग्रेह पनुन, अनुग्रेह पनुन अनुभावतम ॥० ॥

प्यठ दानु तावस भावु बूजन छावु बापथ लोदमुतुय,  
 बानसुय प्यठ ठानु चोनुय यिनुसह थवहस अडुवोथुय ।  
 छावु रोसतुय रावि मजु अथ ग्राव मतु करनावतम ॥  
 अनुभावतम अनुग्रेह पनुन, अनुग्रेह पनुन अनुभावतम ॥० ॥

छावु सुत्यन प्रावि मेछर त्रावि पशपुन युथ न्यबर,  
 वास करवुन टास कडि युथ खास न्यामथ ख्यथ ज़बर ।  
 सुय मे हमसोस छुय दिलस मंज अंद मे सुय वातनावतम ॥  
 अनुभावतम अनुग्रेह पनुन, अनुग्रेह पनुन अनुभावतम ॥० ॥

बौछ मे बूजुम भावकुय छुख, वुछ सौ मे च़ेय क्युत कोर तयार,  
 तँछ तँछ दिलस मंज रोछ मे च़े क्युत, वुछतु छा लायिकि कार ।  
 दौर मुच़रिथ तौर छि चॉनी थँज कौर म्यौनी थावतम ॥  
 अनुभावतम अनुग्रेह पनुन, अनुग्रेह पनुन अनुभावतम ॥० ॥



ओन ज़न बु वुछिहा नोन पहान सोन यि चोनुय कारिज़ार,  
 अँछ चु मुचराव जूग्य रायो नतु मे राव्यम खौर्य खार ।  
 वॉन्से अंदर यिनु काँसि होवुम ती मे अज़ चुय हावतम ॥  
 अनुभावतम अनुग्रेह पनुन, अनुग्रेह पनुन अनुभावतम ॥०॥

मंज़ नयामचन नूना गॉलिथ देह म्योन गछि च़ेय सुत्य रँलिथ,  
 द्वख दौद्य ज़नमन हुंद्य बँलिथ गछुहन चु बोज़ख योद वँलिथ ।  
 रज़ मे करतम अज़ पनुन्य चुय दुय प्रॉन्य व्वन्य मँशरावतम ॥  
 अनुभावतम अनुग्रेह पनुन, अनुग्रेह पनुन अनुभावतम ॥०॥

अबिज़्यथ यि बनि 'अभिलाश' म्योन च़ेपि आसि समयस दोद म्योन,  
 न्यँतरन मे हावि प्रकाश चोन मोसूम यि दिल कडि वाश म्योन ।  
 छम आश चॉनी व्वन्य मे बस दस पानु अथ तुलनावतम ॥  
 अनुभावतम अनुग्रेह पनुन, अनुग्रेह पनुन अनुभावतम ॥०॥



## ऊर्य नु यूर्य

कांह कॅरिव व्वपकार मेत्रव न्यॅतरन मै हॉव्यतोन प्रानु चूर,  
 दथ गॅमुच छम यथ व्वंदस मै च्यथ तवय छुम ऊर्य नु यूर्य।  
 पथ वनन येम्य जाय रॅटमुच तनि मॅलिथ थोवमुत छु सूर॥  
 दथ गॅमुच छम यथ व्वंदस मै च्यथ तवय छुम ऊर्य यूर्य॥०॥

हतु बॅद्य ज़नुम ह्यथ पथ कुनथ कथ मै ज़ांह कॅरनम नु पूर,  
 सथ मै थॅवनम तिथ कन्यथ व्यथ रूज़ पकुवुन्य दूर दूर।  
 गाश ज़ॉलिथ आश रूज़ुम वुन्य नॅ वुन्य वात्यम सु यूर्य॥  
 दथ गॅमुच छम यथ व्वंदस मै च्यथ तवय छुम ऊर्य नु यूर्य॥०॥

ब्राँच तॅम्य सुंज़ि रॉच राव्यम वॉच कोनु तस शौछ यि म्याँन्य,  
 कर्मु खंड्यथ धर्मु हीनस वुनि स्यठा लगज़िश छि प्रॉन्य।  
 यथ गरस ज़ांह लॅज नु व्वसु द्रवस य्वसु मै करिह्यम शाद पूर॥  
 दथ गॅमुच छम यथ व्वंदस मै च्यथ तवय छुम ऊर्य नु यूर्य॥०॥

बोज़ुवुन द्यवु बोज़ि शायद सोज़ि केंछा म्यानि नॉव्य,  
 रोज़िहे प्रैयमुक निशाना नेरुहन अरमान लॉव्य।  
 धर्मु पुछ्य केंह दान दियिहे ह्यथ सु यियिहे पानु यूर्य॥  
 दथ गॅमुच छम यथ व्वंदस मै च्यथ तवय छुम ऊर्य नु यूर्य॥०॥

वैकरि आमुत लोल म्योन छैकरिथ वतन प्यठ थोवमस,  
चैकरि प्यठ यी गोव मे इजहार ती लतन तल त्रोवमस।  
हावहस अज सीनु मुचरिथ दोद जखमन छु पूरि पूर ॥  
दथ गैमुच छम यथ व्वंदस मे च्यथ तवय छुम ऊर्य नु यूर्य ॥०॥





## लोलु मस

कस तान्य कुनुन छु बूजुम मस लोलुकुय स्यठा म्यूठ,  
 चनु वालिवुय मै वोनहम म्वल छुस तवय हना क्रूठ।  
 यनु गोव दिलस हवस मैय तनु गोव समय स्यठा ज्यूठ॥  
 कस तान्य कुनुन छु बूजुम मस लोलुकुय स्यठा म्यूठ॥०॥

नवि सरु दिलस छि दुबराय जॉहिर छु बांबरयोमुत,  
 मॉहिर यि मा छु कारस तवु किन्य छु छांबरयोमुत।  
 कॅहरयव यि तनु प्यठय ज़न कुसतान्य अँम्य चवान ड्यूंठ॥  
 कस तान्य कुनुन छु बूजुम मस लोलुकुय स्यठा म्यूठ॥०॥

यनु ड्यूंठ यि म्यूठ मस अँम्य तनु छुम अगादि गोमुत,  
 ज्वल तान्य मॅशिथ गॅमुच छस म्वलुचे छु फिकरि ख्योमुत।  
 दवु दवु कॅरिथ हॅरिथ प्योव वुनि येलि नु कुनि पथर ब्यूठ॥  
 कस तान्य कुनुन छु बूजुम मस लोलुकुय स्यठा म्यूठ॥०॥

नॉनुर मै छुम यि लॉगिथ कांह गॅर मै छम नु खॉली,  
 दामाह अँमिस ति गोछ अख गोमुत तवय वुबॉली।  
 छुय त्रेशि होत बरस तल तॉरीख मतो दितस ज्यूठ॥  
 कस तान्य कुनुन छु बूजुम मस लोलुकुय स्यठा म्यूठ॥०॥

## फवल्यम दिलुकिस डलस पंपोश

नोवुय धर्मा, नोवुय कर्मा, नोवुय ज़नमा मे दारुन छुम,  
 फवल्यम दिलुकिस डलस पंपोश शिवस सुय पूज़ि खारुन छुम।  
 सु शिव यथ जायि शख्ती सुत्य तौतुय अज़ वुन्य मे लारुन छुम॥  
 फवल्यम दिलुकिस डलस पंपोश शिवस सुय पूज़ि खारुन छुम॥०॥

मे गारुन छुम सु थोद थानय बिह्थि यथ जायि शिव पानय,  
 गुहुल गौलिथ शुहुल गछि दूर स्वयं प्रकाश पेयम पानय।  
 अन्यन अँछन अन्यम युस गाश मे सुय प्रकाश छारुन छुम॥  
 फवल्यम दिलुकिस डलस पंपोश शिवस सुय पूज़ि खारुन छुम॥०॥

अचुन दरवाज़ छुम अंदर स्वंदर यथ जायि सुय मन्दर,  
 छु परि पूरन अंदर मन्दर बिह्थि शख्ती सहित शंकर।  
 छु सृष्टी हुंद यिसुय आदार मे सुय फनकार छारुन छुम॥  
 फवल्यम दिलुकिस डलस पंपोश शिवस सुय पूज़ि खारुन छुम॥०॥

बैसिथ कायाजि मंज़ करतार करान पवनुक छु सुय आहार,  
 छु सिरयुक तस ड्यकस अनुहार चिह्नन म्यान्यन करान शुमार।  
 दिहन अंदर यसुंद दरबार मे सुय सरकार छारुन छुम॥  
 फवल्यम दिलुकिस डलस पंपोश शिवस सुय पूज़ि खारुन छुम॥०॥

दज्यम देहकुय मै येलि अभिमान वुज्यम अदु आत्म ज्ञानुच ज्ञान,  
 सज्यम येलि प्रेयमु लोलुक कान पज्यम पादन मै पशुरुन पान ।  
 दिवान बॅख्ती छु बूजुम दान मै सुय भगवान छारुन छुम ॥  
 फवल्यम दिलुकिस डलस पंपोश शिवस सुय पूजि खारुन छुम ॥०॥

पयस प्यठ द्राव युस पानय तयस प्यठ कॅरिन सामानस,  
 बयस म्यूल तस तॅती म्वकजार दयस सुत्य येम्य थवुय ज्ञानय ।  
 छि यस नॉल्य मालु कालु शहमारय मै अज सुय यार छारुन छुम ॥  
 फवल्यम दिलुकिस डलस पंपोश शिवस सुय पूजि खारुन छुम ॥०॥





## मे सपदि संतुष्ट

मे भाग्य कर्मस यिया सु अवसर,  
मे सपदि संतुष्ट सु ठोठ ईशर ।  
यथ हृदथि कूठरि सु मचरिहे बर ॥  
मे सपदि संतुष्ट सु ठोठ ईशर ॥०॥

ठेकुर कुठिस मंज सु प्रावि आसन,  
दिशायि देहवय स्वनुसँहजु मे बासन ।  
यिम चेशमु वुछहन तँमिस निरनतर ॥  
मे सपदि संतुष्ट सु ठोठ ईशर ॥०॥

प्रचंड सु तीजुक पेयम मे पानस,  
भसँम करि सौर्यसुय म्यानिस अज्ञानस ।  
शुदी बुधी बनि साक्षात मे सास बासकर ॥  
मे सपदि संतुष्ट सु ठोठ ईशर ॥०॥

सु वनि मे वन बा मे क्या नाद छुम,  
दपस चे वुछथुय स्यठाह दिल शाद छुम ।  
यि प्रेम म्युल बनि राधा स्वयंमवर ॥  
मे सपदि संतुष्ट सु ठोठ ईशर ॥०॥

होशा त्रॉविथ वुछ दशा मे गॉमुच,  
 जीरण अवसथा काया रुनेमुच ।  
 योवन छु क्रीडा पीडा छु बुजर ॥  
 मे सपदि संतुष्ट सु ठोठ ईशर ॥० ॥

भ्यख्या मंगस बस बु बखित भावुच,  
 दपस मे सुमरन दिम पननि नावुच ।  
 बु जूल्य दॉरिथ प्रारस गधा गर ॥  
 मे सपदि संतुष्ट सु ठोठ प्रारस ईशर ॥० ॥

यि प्रेम दून्य दजि म्यानिस मनस मंज,  
 मन र्योश बॅनिथ रोजि तपूवनस मंज ।  
 रेशुत मे रोवुम बु छुस दरबुदर ॥  
 मे सपदि संतुष्ट सु ठोठ ईशर ॥० ॥

बनुन पनुन येलि वनस व्यसतॉरिथ,  
 सु बोजि सोरूय यि मोन दॉरिथ ।  
 जुदा गोमुत यियि मुदा बराबर ॥  
 मे सपदि संतुष्ट सु ठोठ ईशर ॥० ॥

अद्रष्य गोमुत यियि द्वष्टिमान येलि,  
 यि पान बु ज्ञानन छु भाग्यवान तेलि ।  
 सु रोज़ि मे निश यिवान अक्सर ॥  
 मे सपदि संतुष्ट सु ठोठ ईशर ॥० ॥

प्रखुट सु पानस अंदर मे बास्यम,  
 यि दुयी तु दोगन्यार सोरुय मे कास्यम ।  
 छोन्यर येलि लोलुक गछियम बराबर ॥  
 मे सपदि संतुष्ट सु ठोठ ईशर ॥० ॥

शौंगिथ छु शायद यि लोल म्योनुय,  
 गोमुत मोलुत मन तवय छु म्योनुय ।  
 सुरिथ तु सौंभरिथ थावुन छु अंमबर ॥  
 मे सपदि संतुष्ट सु ठोठ ईशर ॥० ॥





## रछ मैति पादन तल

मूल मूर्खा अज़ हय आव चानि डेडि तल,  
 गछि मेहरबान रछि मैति पादन तल ।  
 नेशि ब्वदसुय वेशयव कॅर गांगल ॥  
 गछि मेहरबान रछि मैति पादन तल ॥०॥

मुह न्येन्दरे मॉजी वुज़नावतम,  
 ज्ञानु ध्यानुच ज्ञाना करनावतम ।  
 ज्ञानु ध्यानुच दौन्य नाय छैय मै अठुकल ॥  
 गछि मेहरबान रछि मैति पादन तल ॥०॥

मूर्खु मन गोम मोत यथ मायाये,  
 साज़ पौरान नशिवर कायाये ।  
 ख्यथ चथ हय तोति म्यौन्य च्यथ चंचल ॥  
 गछि मेहरबान रछि मैति पादन तल ॥०॥

देह कूठरि दारि बर हेतिन द्वदरुन्य,  
 मुह मॅर्यसुय ह्यस होश हेतिन व्यसरुन्य ।  
 अंद वातुनि लोग म्योन प्रोन अन्ज़ल ॥  
 गछि मेहरबान रछि मैति पादन तल ॥०॥

पापु शापव शानु म्यानि आयि जुलनय,  
 जनुम जायि गोम जखुम रूद्य म्योन्य बलनय।  
 पानु जानान छख कूत छुस न्यरबल ॥  
 गछि मेहरबान रछि मेति पादन तल ॥०॥

यूग न्यन्दरे सावतम दैल्यसुय तल,  
 कर्म लॉनिस बनिह्यम सर्वु मंगल।  
 कालु ओबरु तलु युथ हय नेरि सिरयि न्यर्मल ॥  
 गछि मेहरबान रछि मेति पादन तल ॥०॥

जांह मा जोनुम देह छु म्योन नापायदार,  
 गोंड मे पानस दोहय अभिमानु दसतार।  
 कालु गंगुबल सुबहन नाय गोस यारुबल ॥  
 गछि मेहरबान रछि मेति पादन तल ॥०॥

दैह त्याग मॉज छुम करुन मे कुनि सातन,  
 रिशतु म्वकलन कुस कस क्या छु वातन।  
 यितु गछि हुंज चठतम जॉद्य हाँकल ॥  
 गछि मेहरबान रछि मेति पादन तल ॥०॥

अनिगटि मंज ह्यनु आमुत छु 'अभिलाश',  
 वनि कडिहीय छुस मा न्यंतरन सु गाश।  
 पोतरु ताने छलतम चु मनुसुय मल ॥  
 गछि मेहरबान रछि मेति पादन तल ॥०॥

## ही भवौनी

बासि प्रत्यख कासि ग्रेहचार सौनी,  
 करि अनुग्रेह गरि गरि ही भवौनी ।  
 दूर दुरगथ करि सौन्य नैव तु प्राँनी ॥  
 करि अनुग्रेह गरि गरि ही भवौनी ॥० ॥

जूग्य भूगान सँन्यास वननुय मंज,  
 यूग साधान चानि वेरि मनुसुय मंज ।  
 सर्व मंगल अदु छि तिम प्रावौनी ॥  
 करि अनुग्रेह गरि गरि ही भवौनी ॥० ॥

रेश छि रूशिथ चँल्यमित्य संसारस,  
 पोश छि पूजान अपजिस व्यवहारस ।  
 मोथ मँशरिथ तिम गँमित्य छि अभिमौनी ॥  
 करि अनुग्रेह गरि गरि ही भवौनी ॥० ॥

सोपनु माया ज़ोन तिमवुय यि संसार,  
 ख्यन त्रौवुख मन येलि गोख बेदार ।  
 छ्यन सुमरनि चानि छिनु तिम करौनी ॥  
 करि अनुग्रेह गरि गरि ही भवौनी ॥० ॥



ह्यतु हूरा संसार न्युन क्या छु तोर,  
रत रुकने कथ प्यठ हावन्य छि ज़ोर ।  
च्यतु विमरशाय ज़ीवु रोज़ चुय करौनी ॥  
करि अनुग्रेह गरि गरि ही भवौनी ॥० ॥

दारि औतार करि खेय बेयि राखिसन,  
थांथरेमित्य ब्रह्मण गरु गछुहन ।  
खारि अलमन औंकार बेयि निशानी ॥  
करि अनुग्रेह गरि गरि ही भवौनी ॥० ॥

शंखु नादव सुत्य ग्रेज़ि बेयि रेशवॉर,  
चानि यछायि निश तथ क्या लगि तौर ।  
कशपु क्वलची पानु रठ चु निगरौनी ॥  
करि अनुग्रेह गरि गरि ही भवौनी ॥० ॥

प्रेयमु चाने चैयि मे तीर्थन हुंघ ज़ल,  
राय रूज़ुम छलनु यियि मे मनुकुय मल ।  
हृदयि कोमल बन्यम चॉन्य राजधौनी ॥  
करि अनुग्रेह गरि गरि ही भवौनी ॥० ॥

मूर्ख मदुकुय आहिसर छु 'अभिलाशास',  
चोंग ज़ौलिथ छांडान सु प्रकाशस ।  
यी छुस निशि तय ती सुय छांडौनी ॥  
करि अनुग्रेह गरि गरि ही भवौनी ॥० ॥

## वोवुम कूत ब्योल

वोवुम कूत ब्योल मे सेकि शाठस बोवुम नो तोरु अख दानय,  
 रिवुम कोताह मे पानस सुत्य दोवुम छुन तथ मे अनमानय।  
 ख्वचर कोताह मे छुम कर्मस ति ज्ञानान पानु भगवानय॥  
 वोवुम कूत ब्योल मे सेकि शाठस बोवुम नो तोरु अख दानय॥०॥

कंड्यव क्रेहन्यव छु कोरमुत ओश चमन गोमुत छु वॉरानय,  
 जंडव अथ गौन गुहुल कोरमुत तवय केह छुस नु व्वपदानय।  
 मे ओस हमसोस बु शेरस पोश बनावन बागि बोसतानय॥  
 वोवुम कूत ब्योल मे सेकि शाठस बोवुम नो तोरु अख दानय॥०॥

गन्यर गालुन छु कोताह क्रूठ वुछिथ ती छुस बु व्रॅहरानय,  
 सन्यर मूलन छु त्यूताह ज्यूठ व्वजुल न्यूल छुम मे बासानय।  
 बुडिथ बेशक कुडुर कोताह छु सुरवुन प्रोन छ्योट बानय॥  
 वोवुम कूत ब्योल मे सेकि शाठस बोवुम नो तोरु अख दानय॥०॥

बंजर बेहद पुटुम प्रोटुम मेचे मुसजार नु सिरय दानय,  
 गॅयम छ्वकुलद तने हन हन मगर मन छुम नु ठॅहरानय।  
 रोटुस पापव चोटुस त्रॉविथ मे छुम कोताह यि अज्ञानय॥  
 वोवुम कूत ब्योल मे सेकि शाठस बोवुम नो तोरु अख दानय॥०॥



शँथुर पॉन्शाय मे पतु रूदिम ब्रंजिस केह छिम नु त्रावानय,  
 न्यँथुर वँट्य वँट्य खँटिथ रूजिथ यिमन तोति छुस बु रोजानय।  
 अँथुर अँन्दरी लँजिम पानस शँथुर शतरंज मे खेलानय॥  
 वोवुम कूत ब्योल मे सेकि शाठस बोवुम नो तोरु अख दानय॥०॥

द्वखन म्यान्यन तुलान आनंद छु कुसतान्य दूरि डेंशानय,  
 शिवस रूजिथ शरण बुय छुस पनुन करिह्यम सु कल्यानय।  
 ग्यवुन शाहन अंदर शासतुर मे छुम यँचकोल अरमानय॥  
 वोवुम कूत ब्योल मे सेकि शाठस बोवुम नो तोरु अख दानय॥०॥

मे गोव यँचकाल ज़नुम दारान मे छुन कुनि जायि ठिकानय,  
 परम शीवस बु छुस प्रारन पनुन हाविहम सु थोद थानय।  
 क्रंज़न मंज़ रेश रँटिथ यिम जुव तिमन बूजुम छु समखानय॥  
 वोवुम कूत ब्योल मे सेकि शाठस बोवुम नो तोरु अख दानय॥०॥

कोरुम हॉसिल नु कांह शरफा दितुन मा केह मे निशानय,  
 अँन्दुर्य अरमान छु 'अभिलाशस' तवय गोमुत छु देवानय।  
 करुस अनुग्रेह थवस बँर्य बँर्य यिथे व्यचारु पयमानय॥  
 वोवुम कूत ब्योल मे सेकि शाठस बोवुम नो तोरु अख दानय॥०॥



## ग्वड मै ह्योतमय

मलि मेछरा चु वॉनी म्याने,  
ग्वड मै ह्योतमय लीलायि चाने।  
नवि हवसय तु हमसोसु प्राने॥  
ग्वड मै ह्योतमय लीलायि चाने॥०॥

अबदु रोसतुय शब्दन माने,  
वसि आकाशि खसि हटि म्याने।  
ती छु संभव अनु ग्रेह चाने॥  
ग्वड मै ह्योतमय लीलायि चाने॥०॥

खोलि दरवाज़ु बोलि ज़न कोसतूर,  
ग्रज़ि आलम वज़ि साज़ु संतूर।  
नचि सृष्टी दृष्टी चाने॥  
ग्वड मै ह्योतमय लीलायि चाने॥०॥

सिरयि चॅन्द्रम छु चोनुय प्रखचर,  
गथ चें पथ वुछ दिवान मै अकसर।  
पोत खोत नु ज़ांह सीवायि चाने॥  
ग्वड मै ह्योतमय लीलायि चाने॥०॥

हृदयि आकाश म्योन कर चु न्यर्मल,  
 ज्ञानु तारख प्रजलन जल जल।  
 कालु ओबर चलि वुछिथ छायाि चाने॥  
 ग्वड मे ह्योतमय लीलायि चाने॥०॥

छुम मे यॅचकोल मनसुय हमसोस,  
 लोलु चाने बरनु यियि मनु खोस।  
 थफ दि कलमस लेख मे ड्यकुलाने॥  
 ग्वड मे ह्योतमय लीलायि चाने॥०॥

तालि पेठ्य नेरि छठ युथ खॉसिस,  
 अदु मे त्रफती यियि यथ बॉसिस।  
 रुम मे शौहलन अमि लोलु वाने॥  
 ग्वड मे ह्योतमय लीलायि चाने॥०॥

थवु बु खॅटिथुय बु नय वनु कॉन्से,  
 माजि द्युतनम तु पोशनावु वॉन्से।  
 गंड चु केंछा अजलु लोचि म्याने॥  
 ग्वड मे ह्योतमय लीलायि चाने॥०॥

कर्म खुर कास मॉज मे कंगालस,  
 दस तुल चनसय अथ प्रेयमु प्यालस ।  
 खेय मे पापन गछि तीजु चाने ॥  
 ग्वड मे ह्योतमय लीलायि चाने ॥०॥

माजि मंगनस क्या सना छु मंदछुन,  
 चानि देस्य गोव संभव मे योर युन ।  
 वतु गतुसय नतु कुस मे ज्ञाने ॥  
 ग्वड मे ह्योतमय लीलायि चाने ॥०॥

‘अभिलाशस’ मन स्यठा लाचार,  
 भय छुस दय मा करि मेय संगसार ।  
 खँटिथ ख्वनि मंज रटुन पोतरु ताने ॥  
 ग्वड मे ह्योतमय लीलायि चाने ॥०॥





## छोरुय पान

बैखृत्यव छि अँन्यमित्य बैर्य बैर्य चंदय,  
 बु क्या चै वंदय छोरुय पान ।  
 मंज सभायि मा गछु शर्मन्दुय ॥  
 बु क्या वंदय चै छोरुय पान ॥० ॥

सथ ज़न ह्वाथ आयि पोश डालि जान जान,  
 बबस छि च़रनन तु शेरि लागान ।  
 यिम छी चै पूजान प्यठु अंदु वंदय ॥  
 बु क्या वंदय चै छोरुय पान ॥० ॥

केंचव छि अँन्यमित्य लवुहँत्य गुलाब,  
 केंचव ब्यल तय बैयि मादल ।  
 यिमन सुत्य छुय प्रोन संबंधुय ॥  
 बु क्या वंदय चै छोरुय पान ॥० ॥

कैह छी आमृत्य लोलु तु माये,  
 कैह व्यवहारुचि हाजथ रवाये ।  
 दयायि बापथ छी दरमंदय ॥  
 बु क्या वंदय चै छोरुय पान ॥० ॥

बॅखती हीनस छि सीनस दुबराय,  
 बबा अज़ कर म्योन केंह पाय।  
 थ्यथ रटि च्यथ म्योन प्रकाशि अन्दय॥  
 बु क्या वंदय चे छोरुय पान॥०॥

मनु मदु हॅसतिस श्रद्धायि रोसतिस,  
 जांह मा वुज्योस चोन अनुराग।  
 अँम्य हॅस्य पोवुस बुय फंदु फंदय॥  
 बु क्या वंदय चे छोरुय पान॥०॥

व्वंदस म्यॉनिस छु शिशुर लोगमुत,  
 तुरुन योहय ज़न ह्यू माग।  
 कमि वीदु वेगल्यम कमि यूग मंदय॥  
 बु क्या वंदय चे छोरुय पान॥०॥

इयकसुय यस छुन दयि लोलुक यूग,  
 गाटुजार तस क्या करि बुद्यूग।  
 कैर्य कैर्य नेशफॅल्य गॅयि म्यॉन्य ग्रंदय॥  
 बु क्या वंदय चे छोरुय पान॥०॥

साधन छि चौर्य चौर्य कठ ज़न कतरान,  
 रेश वारि राख्यस रास खेलान ।  
 उपद्रव वोथमुत छु प्रथ कुनि अंदय ॥  
 बु क्या वंदय च़े छोरुय पान ॥० ॥

भगवानु यिखना बेयि औतारस,  
 उद्धार करने संसारस ।  
 वनु वास बूगान च़ान्य टॉठ्य बंदय ॥  
 बु क्या वंदय च़े छोरुय पान ॥० ॥

‘अभलाश’ आमुत छु डेडितल चाने,  
 परतीत बेंड म्यॉन्य बरु तल चाने ।  
 अदु द्यवु मैति पचि सु परमानंदय ॥  
 बु क्या वंदय च़े छोरुय पान ॥० ॥





## बडि भगवानु

भगवानु, भगवानु ही बडि भगवानु,  
 कर्म लोन म्योन शेरतन तमि अनमानु।  
 अख चु रोज़ख ख्वश बैयि प्रसन रोज़ पानु॥  
 भगवानु, भगवानु ही बडि भगवानु॥०॥

निनु तु ख्यनु आमुत छुस सुत्य अज्ञानु,  
 बानु छिम बॅर्य बॅर्य अभिमानु सामानु।  
 ज़लु सुत्य मल चोल नु कुनि जायि तिर्थु श्रानु॥  
 भगवानु, भगवानु ही बडि भगवानु॥०॥

रठ कमान तमि आयि अथ म्यानि वासनायि,  
 तृष्णायि त्रफती यियि स्वक्रथ कमायि।  
 पापु रोस पुनि सोस तुलु प्रालब्ध दानु॥  
 भगवानु, भगवानु ही बडि भगवानु॥०॥

यी चु केंछा दिहम ती मानु प्रमानु,  
 अनु धनु अनुग्रेह छुम दयायि हुंद निशानु।  
 ध्यान मंज़ु दर्शुन हावतम चु रोज़ानु॥  
 भगवानु, भगवानु ही बडि भगवानु॥०॥

कीवल कुनुय अख छुम चै निशि हाजथ,  
 नेति नेमु चैय क्युत केह गछुन सनच्यथ ।  
 वुजनावुम बखित भाव यथ नु आसि पयमानु ॥  
 भगवानु, भगवानु ही बडि भगवानु ॥० ॥

सत ज़न सुमरन करनि चायि ग्वफायि,  
 कायायि हुंद कोरुख नु बिल्कुल परवायि ।  
 परमीशरस रूद्य पूज़ान रोज़ानु ॥  
 भगवानु, भगवानु ही बडि भगवानु ॥० ॥

दारि बर त्रौपरिथ क्या न्यूख ज़ौपरिथ,  
 श्रौपरिथ तमि सुत्य आख लोलु वोपरिथ ।  
 बखति बावुकुय तिमन हृदयस बेल्य दानु ॥  
 भगवानु, भगवानु ही बडि भगवानु ॥० ॥

मुह मद मॉरिथ व्वपवास दॉरिथ,  
 नी तिमव ओमकी पन खॉरिथ ।  
 हृदयिकि शीशि मंज़ ईशर छी वुछानु ॥  
 भगवानु, भगवानु ही बडि भगवानु ॥० ॥

जोग्यव नार ज़ोल ज़िदु जुव संसारस,  
दय गॅयख डीशिथ असथ व्यवहारस।  
तिमव बॅर्य तिम खज़ानु यिम नु ज़ांह सोरानु॥  
भगवानु, भगवान ही बडि भगवानु॥०॥

गाटल्यव सोर ब्रौह्य रेशन रॅटिख दामानु,  
पोशन लोग मूर्ख मद तिम तवय छि पशानु।  
भगवान बेशक बॅखुत्यन हुंद बोज़ानु॥  
भगवानु, भगावनु ही बडि भगवानु॥०॥

‘अभिलाश’ बर तल प्रारान पोतरु तानि,  
ज्वयि म्यानि दयि दितु सॅदरुक ह्यू चु बानु।  
ल्वयि ख्वयि चानि ज्वयि सागर छु समखानु॥  
भगवानु, भगवान ही बडि भगवानु॥०॥



## राधा चॉन्य

हा कृष्ण मे सुत्य कर यी चु वादा,  
 ब्वद म्यॉन्य युथ बनि राधा चॉन्य ।  
 नेति प्रेति लायी लोलु होत नादा ॥  
 ब्वद म्यॉन्य युथ बनि राधा चॉन्य ॥० ॥

नचुवनि व्रॅच म्यानि गूपी बनन,  
 व्यचनुय लायख वचुना वनन ।  
 वचनुच वखनय दिल करि शादा ॥  
 ब्वद म्यॉन्य युथ बनि राधा चॉन्य ॥० ॥

सोम्बरिथ पनुन्यन वेशियन तु व्यसन,  
 ख्यनु ख्यनु चैय पथ दिन प्रदिख्यन ।  
 शरन रूजिथ करन समवादा ॥  
 ब्वद म्यॉन्य युथ बनि राधा चॉन्य ॥० ॥

दासु भाव वासना रोजि चरनन तल,  
 अन्ताह करनन म्यान्यन चलि मल ।  
 राधा रूपी छलि चॉन्य पादा ॥  
 ब्वद म्यॉन्य युथ बनि राधा चॉन्य ॥० ॥

मानु रैन्य ध्यानु सुत्य करि अथ वासा,  
 प्रानु अभ्यासु सुत्य खेलि रासा ।  
 शम दम सुत्य बेहि सोरुय क्रकुनादा ॥  
 ब्वद म्यौन्य युथ बनि राधा चौन्य ॥०॥

वौरागु च्यतु प्रावि त्युथ थोद ज्ञाना.  
 त्यागु नागु मंज करि श्वद श्राना ।  
 ख्यनन मंज करि मनन ज्ञादा ॥  
 ब्वद म्यौन्य युथ बनि राधा चौन्य ॥०॥

दिह कुय मुह छुनि सोरुय मॅशरिथ,  
 साधनायि चानि रोज़ि पान पुशरिथ ।  
 अभियासु अनुभव सायं तु प्राता ॥  
 ब्वद म्यौन्य युथ बनि राधा चौन्य ॥०॥

ह्यस होश रोज़्यस नु ग्रेशमुक तु मागुक,  
 नशि, मशि जोश खसि अनुरागुक ।  
 अदु करि अनुभव प्रेयमुक स्वादा ॥  
 ब्वद म्यौन्य युथ बनि राधा चौन्य ॥०॥

श्वद मन बनि त्युथ युथ बिंदराबन,  
 प्रेयमुच कल दियि मीठ्य पादन।  
 नादन कन थाव पाल मॅर्यादा॥  
 ब्वद म्यॉन्य युथ बनि राधा चॉन्य॥०॥

‘अभिलाश’ ऑदीन प्रारान डेडि तल,  
 अंद लोग वातुनि तस अनज़ल।  
 सथ छस ख्यथ नेरि प्रेयमु प्रसाद॥  
 ब्वद म्यॉन्य युथ बनि राधा चॉन्य॥०॥

ॐॐ



## मॉज सरसोतिये

वॉन्सि म्यानि शेठ वॅरी मीज़ान खँतिये,  
मॉज सरसोतिये व्यनती बोज़।  
दयंड्यन प्यठ गँज़रिम बासेम लौतिये॥  
मॉज सरसोतिये व्यनती बोज़॥०॥

च्यथ येलि दिच मेय पथ कालस कुन,  
ज़ून दुर लँजमुच बालस कुन।  
थर वँछ मे पानस तुरि कँड्य खँतिये॥  
मॉज सरसोतिये व्यनती बोज़॥०॥

याद येलि पोवुम व्यचार ठँहरोवुम,  
खोरु शेरु त्रॉवुम नज़र पानस।  
रुम रुम पानस वुछिम गँमित्य छँतिये॥  
मॉज सरसोतिये व्यनती बोज़॥०॥

यिम इशारु टाकारु वुछी मे न्यँतरव,  
शँतरव डॉजिहम च्यथ तय वथ।  
पाँछ यार मे दोहय प्यठ सवारि खँतिये॥  
मॉज सरसोतिये व्यनती बोज़॥०॥

लारि होत आरुकोत चै शरन आसय,  
 दासय भावय रछतम चुय ।  
 प्रान वंदय पादन यिम चु करतख पँतिये ॥  
 माँज सरसोतिये व्यनती बोझ ॥० ॥

क्वपोतुर छुस माँजी अवुगुन छिम वाराह,  
 पाप शाप बखशनस छुय नु कांह चाराह ।  
 महाकाल मटि हैयि नु मे निनस तोतये ॥  
 माँज सरसोतिये व्यनती बोझ ॥० ॥

अन्तु समयस यिनु काया डोल्यम,  
 वेलि परिवार म्योन तोलि त्रेशि गँल्य ।  
 मरनस प्रारनम गछन आरुक्कतिये ॥  
 माँज सरसोतिये व्यनती बोझ ॥० ॥

त्रिभवन नाथस यी छुम मोगमुत,  
 शोंगमुत ज़न आसु न्यँन्दरे मंज़ ।  
 पाँछ प्राण नेरन येलि मे सोत सोतये ॥  
 माँज सरसोतिये व्यनती बोझ ॥० ॥

‘अभिलाशस’ दितु बखती प्रसादा,  
 यादा वॅरी युथ तेज़्यस चॉन्य ।  
 मरुन मॅशरिथ माँज लागय पादन पोशि फँतिये ॥  
 माँज सरसोतिये व्यनती बोझ ॥० ॥

## क्या करु व्वन्य

जोग्यो मे ना चॉन्य माय छनु फेरान,  
 बु हा छुस त्रहरान क्या करु व्वन्य।  
 यिम शर अकसर यूगियन छि नेरान॥  
 बु हा छुस त्रहरान क्या करु व्वन्य॥०॥

दिक्कार म्यॉनिस यथ ज़िन्दु रोज़नस,  
 सतसंग बोज़नस आयम नु वॉर्य।  
 सत संग छु प्रेयमु भाव बानन शेरान॥  
 बु हा छुस त्रहरान क्या करु व्वन्य॥०॥

लोलुच दून्या रोज़िह्यम दज़ुवन्य,  
 वज़ुवन्य सत कर्म लोलुच तार।  
 शाह छारि शाहस अज्ञान तु नेरान॥  
 बु हा छुस त्रहरान क्या करु व्वन्य॥०॥

केंचन चै सुत्य छे मित्राचॉरी,  
 केंह करान ताबे दॉरी चॉन्य।  
 मुख्र ब्वज़ म्यानि छुन केंह अंदर ठँहरान॥  
 बु हा छुस त्रहरान क्या करु व्वन्य॥०॥



औन ज़ोर लोगुम डीशिथ तु बूज़िथ,  
 सूज़िथ तोति कुत्य पॉगाम च़ेय ।  
 मगरूर मनसुय कैंह छुम नु गोरान ॥  
 बु हा छुस त्रहरान क्या करु व्वन्य ॥० ॥

खोरु शेरु चादर हॉचुम प्यठु पानस,  
 डाफ दिथ रूदुस अज्ञानस मंज़ ।  
 अपज़्युक सामानु रूदस बु पॉरान ॥  
 बु हा छुस त्रहरान क्या करु व्वन्य ॥० ॥

दय ज़ानि क्या बनि अँछ छम फोरान,  
 वोरान क्याज़ि छुस सोपनस मंज़ ।  
 दुर वासनायि वुछम देह म्योन लोहरान ॥  
 बु हा छुस त्रहरान क्या करु व्वन्य ॥० ॥

ध्यानु यूग्य च़ामुत्य ध्यानु अवस्थायि मंज़,  
 प्राणु अभ्यासुय छिय करान चॉन्य संज़ ।  
 ज़ानु, ध्यानु, प्राणु, अभ्यासु च़ेय छारान ॥  
 बु हा छुस त्रहरान क्या करु व्वन्य ॥० ॥

‘अभिलाशि’ बख़्ति भावु मन वुफलावतम,  
 लैम्बि मंज़ पंपोश फवलनावतन ।  
 दैंह दिशायि हृदयिचि रोज़न शोलु मारान ॥  
 बु हा छुस त्रहरान क्या करु व्वन्य ॥० ॥

## जॉल्य हारि

नेरि हाजथ मे दरबारु चाने,  
गंडि केंछा अज़लु लोचि म्याने।  
ती मे गँड्यज़्यम यी नु ज़ांह प्राने॥  
गंडि केंछा अज़लु लोचि म्याने॥०॥

दनु द्यारन हुंद छुम नु हावस,  
बखित बावा गोछुम वरतावस।  
सुय बु लागय पूजायि चाने॥  
गंडि केंछा अज़लु लोचि म्याने॥०॥

कर्म लोन येलि मे परखोवुम,  
ब्रँड्य कँडिहम यिमनुय होवुम।  
कारि खम च़ाम ज़ोनुम हय माने॥  
गंडि केंछा अज़लु लोचि म्याने॥०॥

छ्यपु छोरिस ग्युंदनम नँसीबन,  
ख्योम वाराह नेशफँल्य गोम ज़नम।  
क्या छु कारण क्वदरत ज़ाने॥  
गंडि केंछा अज़लु लोचि म्याने॥०॥

जूग्य चॅल्यमित्य छि दूर संसारस,  
 यूग साधान छांडान यारस।  
 आदि अन्तस छि छांडान माने॥  
 गंडि केंछा अज़लु लोचि म्याने॥०॥

बॅखुत्य ज़न वुछिम बेदार रातस,  
 ज़ागि रूज़िथ वुज़गथ नाथसं।  
 आमि पनु ऑस्य मेनमन वतु चाने।  
 गंडि केंछा अज़लु लोचि म्याने॥०॥

वॉन्स लॉजिम येलि वरतावस,  
 गोम अभिमान चोम मुहुकुय मस।  
 नु पिशुम पान नु कोडम छाने॥  
 गंडि केंछा अज़लु लोचि म्याने॥०॥

आस बेख्यायि डेडि तल चाने,  
 वुछतु फुतु फुतु गोमुत जोलि म्याने।  
 जॉल्य हारि गॅयम वॉन्स दानि दाने॥  
 गंडि केंछा अज़लु लोचि म्याने॥०॥



बखति भावुकुय दितम बेल्य दाना,  
 डीड्य वॉनिस सुत्य बनि ज़ाना ।  
 बर सुय मुच़रावि ऑगन्यायि चाने ॥  
 गंडि केंछा अज़लु लोचि म्याने ॥० ॥

हेरि खसनुक ख़ोव 'अभिलाषस',  
 लगि समया तस तोर वातुनस ।  
 थपि चाने खँसिथ हेरि ज़ाने ॥  
 गंडि केंछा अज़लु लोचि म्याने ॥० ॥



## सन्तो वनतो

दय करि द्रुय म्यॉन्य प्रथ सातन्तो,  
 सन्तो वनतो त्युथ कांह व्वपाय ।  
 पानु मंजु प्राणु चूर युथ प्रजुवन्तो ॥  
 सन्तो वनतो त्युथ कांह व्वपाय ॥० ॥

जन्मादिक गॅयम जनुम दारनतो,  
 कुनि जायि लोबमस नु नेब तु निशान ।  
 चानि उपदेश बूजुम बु डेंशनतो ॥  
 सन्तो वनतो त्युथ कांह व्वपाय ॥० ॥

ज्ञानुच ज्ञान दिम ध्यानुक धनतो,  
 शोभायिमान बनि युथ मन म्योन ।  
 दय प्रावि यथ मंजु पनुन आसनतो ॥  
 सन्तो वनतो त्युथ कांह व्वपाय ॥० ॥

कलि कालस मंजु आमुत ह्यनतो,  
 ख्यनु ख्यनु मनुकुय डलान विशवास ।  
 कमि वैजि वश गछि चंचल मनतो ॥  
 सन्तो वनतो त्युथ कांह व्वपाय ॥० ॥

यूगी तु जूग्य रूद्य येति निर्धनतो,  
 ब्रम् मंजु तिम रूद्य ब्रमचोरी।  
 तिहिंज संपदा कीवल ईशर सुमरनतो॥  
 सन्तो वनतो त्युथ कांह व्वपाय॥०॥

भोगु बवछरन वौल म्योनुय मनतो,  
 योगुक छुमनु कांह श्रूच साधन।  
 दुर वासनायन लगि युथ छ्यनतो॥  
 सन्तो वनतो त्युथ कांह व्वपाय॥०॥

तुलि तुलि अपज्युक ओला यूरुम,  
 शूरुम जांह मा डोकुर कुठ।  
 हृदयस मंज छुय दय रोजनतो॥  
 सन्तो वनतो त्युथ कांह व्वपाय॥०॥

‘अभिलाशस’ छुनु कुनि डंजि मनतो,  
 थ्यथ दिस च्यथ करि चॉन्य सुमरन।  
 निर्धन युथ वालि नखु चॉन्य र्यनतो॥  
 सन्तो वनतो त्युथ कांह व्वपाय॥०॥



## व्यनथ

पोंपी बु छुस छम थरु थरय,  
 सेदि बुथि निज्यम परमीशरय ।  
 चेय रोस नु पोज़ कांह आसरय ॥  
 सेदि बुथि निज्यम परमीशरय ॥०॥

साम येलि ह्यँचुम मे पानुसुय,  
 त्रहरयोस वुछिथ मंज़ ध्यानसुय ।  
 पांछ नाग वेलिथ नाल अरु वरय ॥  
 सेदि बुथि निज्यम परमीशरय ॥०॥

खूचुस स्यठा गोस हयबुंगय,  
 ब्वज़ि म्यानि बोज़ु वदुनचि दुंगय ।  
 त्राहि त्राहि पोरुन अदु फरु फरय ॥  
 सेदि बुथि निज्यम परमीशरय ॥०॥

पानस द्युतुम द्यठु म्यठु स्यठा,  
 ड्यकुसुय डखि थॉविथ न्यठा ।  
 छरि अथु तरया कांह भवसरय ॥  
 सेदि बुथि निज्यम परमीशरय ॥०॥

आचार व्यचारुक छुम अभाव,  
 ज्यनु प्यठु ज़नमुक छुम स्वभाव।  
 मन किथु गछ्यम एकागरय॥  
 सेदि बुथि निज्यम परमीशरय॥०॥

अरु खोल नैवरुम पानुसुय,  
 रेय छम मे तमिची जानुसुय।  
 रुम रुम मे वोलनम ज़रु ज़रय॥  
 सेदि बुथि निज्यम परमीशरय॥०॥

बुजरा कठ्युन यिनु हावहम,  
 लरु यिनु येती द्वदरावहम।  
 पावहम यिनु दर बिसतरय॥  
 सेदि बुथि निज्यम परमीशरय॥०॥

संसार छु द्वखुकुय आगरुय,  
 अथ मा समाधान मेय सौरुय।  
 हाजथ मे यी ती छुम परय॥  
 सेदि बुथि निज्यम परमीशरय॥०॥

दयि गथ पनुन्य चुय हावातम,  
 मृत्यु शिहुल अनुभावतम ।  
 यम येलि कर्यम प्राणान दरय ॥  
 सेदि बुथि निज्यम परमीशरय ॥० ॥

‘अभिलाश’ निहन येलि चुय गरय,  
 पोत कल थॉव्यज़यस नु अख ज़रय ।  
 यी थवतु मनज़ूर ईशरय ॥  
 सेदि बुथि निज्यम परमीशरय ॥० ॥





## यॅश्ट दीवस कुन

गोव मे समया प्योव मे अज याद यॅचकॉल्य,  
 यॅश्ट दीवस अज छु म्योन नाद यॅचकॉल्य।  
 पछि तँहुंजे गछि दिल शाद यॅचकॉल्य॥  
 यॅश्ट दीवस अज छु म्योन नाद यॅचकॉल्य॥०॥

वॉल्य कनुनय नॉल्य यस कालु शहमार,  
 अतिसुन्दर चॅन्दरमु डैकि ताजदार।  
 तस राजस छलु अज पाद यॅचकॉल्य॥  
 यॅश्ट दीवस अज छु म्योन नाद यॅचकॉल्य॥०॥

यूग न्यॅन्दरा येति ज़न यॅजमन बाय,  
 वेशनु ब्रह्मा तस प्रछान पननी राय।  
 अज छु जीवस दीवु संवाद यॅचकॉल्य॥  
 यॅश्ट दीवस अज छु म्योन नाद यॅचकॉल्य॥०॥

सर्वु शक्तिमान युस बिहिथ सांगो पांग,  
 जूग्य रूपय यूगुक साद साधान।  
 गरु म्योनुय अचि सुय साध यॅचकॉल्य॥  
 यॅश्ट दीवस अज छु म्योन नाद यॅचकॉल्य॥०॥

दिलु दुबरायि तँम्यसुंज माय गॉमुच,  
 कति तान्य छस तँहुंजय छाय प्यॉमुच।  
 वतु पदिनुय दिम अज दाद यॅचकॉल्य॥  
 यॅश्ट दीवस अज छु म्योन नाद यॅचकॉल्य॥०॥

## अज्ञ यितु गरु म्योनुय

शरु चाने लोगमुत छुम मरु मरु,  
आदि शंकर अज्ञ यितु गरु म्योनुय ।  
यी चु वनुहम ब्रोंठ कुन ती व्वन्य करु ॥  
आदि शंकर अज्ञ यितु गरु म्योनुय ॥०॥

गोवयि पथ कुन ती छुन मॅशरॉविथ,  
गोसु म्योनुय सोरुय छुन त्रॉविथ ।  
द्वन कुनुय बनि युथ आसि अबसन वरु ॥  
आदि शंकर अज्ञ यितु गरु म्योनुय ॥०॥

छुस बु जॉनिथ पानय छुस खतावर,  
गोम सॅर्य पेठ्य आम अदु चोनुय व्यचार ।  
गुतुज गरुवेठ बॅखति भाव चोनुय परु ॥  
आदि शंकर अज्ञ यितु गरु म्योनुय ॥०॥

यिनु सॉ वनुहम मनुहम छुय च़े गोमुत,  
ज्ञानु दीपक छुय मे छ्यतु गोमुत ।  
ज्ञानु दीपक प्रज्ञलाव पानु ईशरु ॥  
आदि शंकर अज्ञ यितु गरु म्योनुय ॥०॥

मे छा ज़ांह कॉल्य च़ेय सुत्य रावुरमुत,  
 न छुथ च़ेय ज़ांह मे कैह परु पोवमुत ।  
 क्या छु कारण बूगान छुस बु दूरयर ॥  
 आदि शंकर अज़ यितु गरु म्योनुय ॥० ॥

सर्वु व्यापक छांडान छी सतज़न,  
 परमु धामस अचनस लूबान मन ।  
 परमु आनंद चुय मे करनावतम सरु ॥  
 आदि शंकर अज़ यितु गरु म्योनुय ॥० ॥

वनि कडुन छुय सनिराह सरु करनुय ।  
 नेह गटि मंज़ श्वद शासतुर परनुय ।  
 सुय छु योगी यस पनुन मन गव थ्यरु ॥  
 आदि शंकर अज़ यितु गरु म्योनुय ॥० ॥

ज़्यादु म्वकल्योव कम कैह व्वन्य छु बाकुय,  
 त्रेशि हँत्यसुय त्रेशा चाव साकुय ।  
 'अभिलाशस' सुय प्यपास कासतु ईशरु ॥  
 आदि शंकर अज़ यितु गरु म्योनुय ॥० ॥



## गाशि मंघुन

मनि मंज ललवुन गछि दुरदानय,  
अदु बासि पानय गाशि मंघुन ।  
भावु रस चावुन गछि पछिसानय ॥  
अदु बासि पानय गाशि मंघुन ॥०॥

तपु जपु र्वनि गंड तँम्यसुय ग्वडनुय,  
श्र्वन्य श्र्वन्य इजिहार गछि पानय ।  
यूग रजि रोजुन मंजुल अँलरानय ॥  
अदु बासि पानय गाशि मंघुन ॥०॥

दृढ विशवासय रटुस दामानय,  
ताब कर नोन नेरि जानानय ।  
सु छु सर्व व्यापख चु छुख अनजानय ॥  
अदु बासि पानय गाशि मंघुन ॥०॥

शमु दमु सुत्यन अछ यूग न्यँन्दरे,  
यँन्दरे वश कँरिथ बन जितेद्रे ।  
कचि रटुख वासनायि करुख प्यठ ठानय ॥  
अदु बासि पानय गाशि मंघुन ॥०॥

त्यागु नागु जलु सुत्य करतो श्रानय,  
 तृष्णायि तृफती यियि पानय ।  
 सन्तोशि व्रतु स्वर तोरुक्य सामान्य ॥  
 अदु बासि पानय गाशि मंद्युन ॥०॥

ल्वयि ख्वयि दयि सुंदि बरतो बानय,  
 ल्वयि ख्वयि सुत्य बनि यकसानय ।  
 यकसान बॅन्यथुय बडियो ज्ञानय ॥  
 अदु बासि पानय गाशि मंद्युन ॥०॥

‘अभिलाश’ पानु रूद वॉन्सि अनज्ञानय,  
 व्वन्य रोट अॅम्य चोन दामानय ।  
 दामानु रॅट्थिय फुटस अभिमानय ॥  
 अदु बासि पानय गाशि मंद्युन ॥०॥

१०८२

## क्षमा पोश

सर्व सृष्टी हुंदि मूलाधारय,  
 क्षमा पोश खारय पूजाये ।  
 केलासु वॉसी त्रिभवन सारय ॥  
 क्षमा पोश खारय पूजाये ॥०॥

त्रन भवनन मंज छुना चोन राजे,  
 चु कसू माजे ज़ामुत छुख ।  
 राज़ पदवी हुंद द्युतनय अधिकारय ॥  
 क्षमा पोश खारय पूजाये ॥०॥

चे कॅम्यू राजि रेनि लाजय कनुवाजे,  
 मृदंग तु बाजे गिंदनस कित्य ।  
 त्रिशूल तु डाबुर दितिनय हॅथियारय ॥  
 क्षमा पोश खारय पूजाये ॥०॥

इयकुसुय चॅन्द्रम थोवनय जॅर्यथुय,  
 क्रूध चोन थोवुन शांत कॅर्यथुय ।  
 प्रपंच ज़गतुक थोवनय कारय ॥  
 क्षमा पोश खारय पूजाये ॥०॥



रछि चै गंजिनय कालु शहमारय,  
 न्यरलीप संसौर्य व्यवहारय ।  
 जूग्य रूपु ब्रमांडुकुय म्वखतारय ॥  
 क्षमा पोश खारय पूजाये ॥०॥

मोह मायायि निश दूर छुख चोलमुत,  
 शमशानु बसमा छुथ मोलमुत ।  
 जगतस कासवुन छुख अंधकारय ॥  
 क्षमा पोश खारयु पूजाये ॥०॥

च्यतुसुय करतम यिम अछर तारय,  
 ओंकुय हृदयस व्यूग खारय ।  
 वीगिस बेहतम पानु सरदारय ॥  
 क्षमा पोश खारय पूजाये ॥०॥

च्यथ म्यौन्य वथ रटि चानि अनहारय,  
 कैलाशि दारय बनि दर्शुन ।  
 'अभिलाषस' टोठ येमी संसारय ॥  
 क्षमा पोश खारय पूजाये ॥०॥



## जटनुय चान्यन पुशरुम पान

यैलि यैलि ह्यनु आस मंज संकटनुय,  
जटनुय चान्यन पुशरुम पान ।  
न्यर्बल देह छुम भयि सुत्य नटनुय ॥  
जटनुय चान्यन पुशरुम पान ॥०॥

अज्ञान वश गोस मंज संसारस,  
चंदु छोन दिमु क्या नावु तारस ।  
निर्धन लाचार लोगमुत छटनुय ॥  
जटनुय चान्यन पुशरुम पान ॥०॥

ज्यनु हांछ गैयम कथ तान्य जाये,  
ह्यनु आस बो मंज दुविदाये ।  
यी छम वोवमुत ती छुस वटनुय ॥  
जटनुय चान्यन पुशरुम पान ॥०॥

जिदगी टेछरा रसु रसु चोपुम,  
तुलु नार बैबि मंज मैय सॉन्पुम ।  
अडु फोट कोरनस संसार ग्रटनुय ॥  
जटनुय चान्यन पुशरुम पान ॥०॥

सत पुरशान हुंज कथ मा मॉनिम,  
 सौपनुच माया सत जॉनिम ।  
 ह्यसु प्योस व्वसरयोस द्वह आयि छ्वटुनय ॥  
 जटनुय चान्यन पशुरुम पान ॥०॥

दॅर्य कॅर्य कॅर्य व्वतुलेयि व्रॅच म्याने,  
 ठॅर्य थॉविथ गॅयि वति चाने ।  
 दुर वासनायव मन छुम छ्यटुनय ॥  
 जटनुय चान्यन पुशरुम पान ॥०॥

वॉन्सि हुंद वर्ष फल द्राव मा तमि आयि,  
 यमि आयि अन्द वाति जन्मन हुंद न्याय ।  
 दिह अभिमान छुमनु तिम वतु रटुन्य ॥  
 जटनुय चान्यन पुशरुम पान ॥०॥

‘अभिलाषि’ ख्यनु ख्यनु अॅथ्य गछि सननुय,  
 भगवान वुछनस छु भगवान बननुय ।  
 दयि नाव बोड व्वपाय छुय संकटुनय ॥  
 जटनुय चान्यन पुशरुम पान ॥०॥



## मेति चाव लोलुक शराब

साकया चेति हसौ छुय सवाब,  
 मेति चाव लोलुक सुय शराब ।  
 दिल म्योन यॅचकोल यथ ब्यताब ॥  
 मेति चाव लोलुक सुय शराब ॥० ॥

बूजुम छु चे निशि देंसतियाब,  
 मँसती छि तथ मंज़ लाजवाब ।  
 त्युथ चाव युथ रोज़ कामयाब ॥  
 मेति चाव लोलुक सुय शराब ॥० ॥

पछ कर मे छुम सख इज़तिराब,  
 सबरुच मे डेज गॉमुच तनाब ।  
 खँट्य खँट्य मु थाव केह दिम जवाब ॥  
 मेति चाव लोलुक सुय शराब ॥० ॥

प्योमुत पथर गोमुत खराब,  
 लवु होत तु फवलुवुन ज़न गुलाब ।  
 पानस मे छुम सॉरिसुय अज़ाब ॥  
 मेति चाव लोलुक सुय शराब ॥० ॥

योदवय चु चावख सुय शराब,  
 श्वद चावतम त्रावुस मु आब ।  
 चनु सुत्य मे यियि ना नौव शबाब ॥  
 मेति चाव लोलुक सुय शराब ॥० ॥

पयमानु लॉग्यज्यस बे हिसाब,  
 वुछज्यस नु केह चुय आबो ताब ।  
 दौदमुत बदन युथ गछि सेराब ॥  
 मेति चाव लोलुक सुय शराब ॥० ॥

थोद तुलि मे युस दिलुकुय नकाब,  
 दिल प्रजलि युथ ज़न आफताब ।  
 तैलि चलि मे येमि दिलुकुय हुबाब ॥  
 मेति चाव लोलुक सुय शराब ॥० ॥

‘अभिलाश’ छु गुल्य गँड्यथुय जिनाब,  
 वॅन्यतोस केह कैर्यतोस खताब ।  
 कर वाति अंद तॅम्यसुंद यि खाब ॥  
 मेति चाव लोलुक सुय शराब ॥० ॥

## आँही कैर्यतोसे

वछि वॉलिंजि लोला बैर्यतोसे,  
अथ तुल्य तुल्य आँही कैर्यतोसे ।  
गिलि साने दिल शाद कैर्यतोसे ॥  
अथ तुल्य तुल्य आँही कैर्यतोसे ॥० ॥

माजि मॉलिस व्वन्य करुन छु कन्यादान,  
काह दैरिथुय दिज्योस दिवगोन जान ।  
श्रूच पोन्या रुमु रुमु जैर्यतोसे ॥  
अथ तुल्य तुल्य आँही कैर्यतोसे ॥० ॥

कूर सॉनी पगाह येलि खसि वीगिस,  
जामु मालिनिक्य गँड्यज्योस ग्वडु प्रीगिस ।  
चूनि र्वपु संजु जामन जैर्यतोसे ॥  
अथ तुल्य तुल्य आँही कैर्यतोसे ॥० ॥

खानु माजे व्वन्य गछुन गरु पननुय,  
कर्म लीखायि कारतस क्या छु वननुय ।  
वीदु वचुना वीगिस पॅर्यतोसे ॥  
अथ तुल्य तुल्य आँही कैर्यतोसे ॥० ॥



गछ चु ड्यकु बॅड बेयि रोज़ ख्वश तु ख्वशहाल,  
 गरु चोनुय रूज़िन मालामाल ।  
 स्वख तु संपदा चंदुनय बॅर्यतोसे ।  
 अथ तुल्य तुल्य ओही कॅर्यतोसे ॥०॥

माजि मॉल्य सुंज़ ओही फ़ुच नीर्यनय,  
 गरि पनने थ्यकुवुनि ड्यकु पूर्यनय ।  
 स्वख सामानु दामानु बॅर्यतोसे ॥  
 अथ तुल्य तुल्य ओही कॅर्यतोसे ॥०॥

ड्यकु थ्यकुवुन नेरि शेरि करमु लोन चोन,  
 असि छु विशवास फ़ूच नेरि अथवास चोन ।  
 सुलि ओही गुलि म्यूठ कॅर्यतोसे ॥  
 अथ तुल्य तुल्य ओही कॅर्यतोसे ॥०॥

दैयवु लीलायि कुस वनि कॅम्य तु क्याज़े,  
 कोरि माल्युन युन छुय पॅछ्य लाज़े ।  
 ड्यकु म्यूठा ज्यूठ अज़ कॅर्यतोसे ॥  
 अथ तुल्य तुल्य ओही कॅर्यतोसे ॥०॥

कोरि माल्यव कूर हा दोहय लुकुमाल,  
जगतस वोत यी करान वाराहकाल।  
कोर यि जगतन तोह्य ती अज कॅर्यतोसे॥  
अथ तुल्य तुल्य ओही कॅर्यतोसे॥०॥

‘अभिलाशस’ कोरि हुंज कल द्रामुच,  
यॅचकाल गोस यनु योर ओस आमुच।  
ओछ मे लोसम शेछ म्योन्य कॅर्यतोसे॥  
अथ तुल्य तुल्य ओही कॅर्यतोसे॥०॥



## वांगुज वोर

वांगुज वॉरिस गोम अख ज़मान,  
 जुव छुम ब्रमान गरु गछुहा।  
 गरु म्योन स्वंदर स्वर्गस समान॥  
 जुव छुम ब्रमान गरु गछुहा॥०॥

सुबहय सिरियि येलि ओस खसान,  
 अचान म्यानिस आंगनस मंज़।  
 आंगनुक्य गुल ऑस्य सिरियिस न्यमान॥  
 जुव छुम ब्रमान गरु गछुहा॥०॥

केंह ऑस्य असान केंह ऑस्य लसान,  
 केंह ऑस्य मंदछान म्वख वुछथुय।  
 ऑविल्य देह ऑस्य शहस लमान॥  
 जुव छुम ब्रमान गरु गछुहा॥०॥

केंह ऑस्य नॅव्य नॅव्य जामय पॉरान,  
 केंह ऑस्य जामन दिवान चाख।  
 मस्ती मंज़ ऑस्य मस्तानु ग्यवान॥  
 जुव छुम ब्रमान गरु गछुहा॥०॥



कैह ओस्य रंगदार व्यलास वॅलिथ,  
 कैह ज़न पानस मॅलिथ सूर।  
 तिय व्यचॅरिथ ब्वद छम वोमान॥  
 जुव छुम ब्रमान गरु गछुहा॥०॥

कैचन मुशुक गोमुत मूरिथ,  
 कैचन फीरिथ गोमुत रंग।  
 स्वय गथ सॉनिस हालस छि प्रमाण॥  
 जुव छुम ब्रमान गरु गछुहा॥०॥

येलि येलि ब्वद म्यॉन्य मुचरनु यिवान,  
 टाकारु तिय छम हॉविथ दिवान।  
 तिय वुछ वुछ छुम पान ज़न श्रमान॥  
 जुव छुम ब्रमान गरु गछुहा॥०॥

‘अभिलाषस’ रोव पनुन ठिकानु,  
 सुय गोस वकानु योर यिनुक।  
 नतु कति वुछिहे सु पुरखू तु दुमानु॥  
 जुव छुम ब्रमान गरु गछुहा॥०॥

## दिल वुछिहे

अगर यि चोन लोल मै वारु सनिहे ।  
छ्वकन यि म्यान्यन बुलगार बनिहे ।।  
ग्रकन छि अँन्दरी यि देग म्यानी ।  
ह्वखन तवय यिम जु वुठ छि म्यौनी ।।

व्वकन छि वॉलिंज मै दादि सुत्यन ।  
टकन तवय दंद यि ज्वय छि म्यौनी ।।  
फ्वकन छु तौसीर मै वुछनु कैह वुनि ।  
थ्यकन छि वाराह यि टौठ्य चौनी ।।

शुमारु रोस्तुय छि ब्यमार मेय हिव्य ।  
अमार ह्यथ यिम दिलस छि चोनुय ।।  
छि गूट्य गूट्य तिम यि बूट्य न्यंगुलान ।  
यिमन ज़न अथि आव सु नुसखु चोनुय ।।

मे रूद अँन्दरी यि नुसखु ललुवुन ।  
बलुन छु बासान महाल म्योनुय ।।  
रलुन मे पैयि सुत्य तिमन फकीरन ।  
यिमन छु वसि मंज़ यि दोद चोनुय ।।

छि म्यूठ ख्यनस क्रुठ स्यठा सँक्रेय ।  
 तवय मचर मन करान छु म्योनुय ॥  
 गहे छुस रगबथ यिवान लोलस ।  
 गेह अँमिस म्युल मशान छु चोनुय ॥

त्रचान छु बूजिथ यि चोन परहेज ।  
 म्वचान मोहिस सोम्ब छु क्रंज म्योनुय ॥  
 रवा छु दौदिस दवा फकत चोन ।  
 मगर मे प्योन गोछ तौसीर चोनुय ॥

फिरॉर्य गोमुत दिल करारु यियिहे ।  
 हना यि दियिहे आराम पानस ॥  
 वँटिथ बु अँछ जु रँटिथ यि निमुहन ।  
 खँटिथ बिहिथ युस अंदर मे पानस ॥

डँटिथ रूजिथ चँटिथ यिम परदय ।  
 अंदर बु अचुहा अथ शीशि खानस ॥  
 नोवुय नवाह जन यि दिल ति वुछिहे ।  
 दवा मे ती ओस ब्यमार पानस ॥



पानु म्यान्यो मो लाग ओनये।  
कर व्यचारा येति छु नेरुनये॥  
अथु छोनये बेयि न्यथुनोनये।  
कर व्यचारा येति छु नेरुनये॥



आँदय आँदय ओस गाशि मंछुनये।  
लोसि सिरयि तु यियि खोचुनये॥  
दोरि दुनिया छुनु पोशिवुनये।  
कर व्यचारा येति छु नेरुनये॥



लेखक

बद्रीनाथ 'अभिलाष'